

११५

दर्ता नं.: ४८/२०७६/७७

पुखां दयूक तदगु सम्पति, भूमिका व संस्कृति
पिकाक-भक्तपुर नगरपालिका



पुखां दयूक तदगु सम्पति, भूमिका व संस्कृति

ख्वप

नेपाल संवत् १९४३ गुँलाँथ्व / २०८० भाद्र १ / 2023 Aug. / त्या: द९, दौँः५

भक्तपुर नगरपालिकाद्वारा सञ्चालित

ख्वप माध्यमिक विद्यालय/शारदा क्याम्पस मा. वि.

ख्वप माध्यमिक विद्यालय स्थापनाको २५ औ वर्ष (रजत वर्ष) प्रवेशको अवसर तथा

ख्वप मा.वि/शारदा क्याम्पस मा.वि.मा कक्षा ११ अध्ययनको लागि भर्ना भएका
नवआगन्तुक विद्यार्थीहरुको स्वागतार्थ आयोजित

Welcome & Orientation Program

August, 2023



ख्वप मा.वि./शारदा क्याम्पस मा.वि या
न्हूँपुँ छनामिपिठा लक्षकुभ

राष्ट्रिय योजना आयोगया डा. फुयाल ख्वप नगरपालिकाय्
(२०८० साउन १४ गते)



मन्थली नगरपालिका प्रमुख श्रेष्ठ ख्वप नगरपालिकाय्
(२०८० साउन १७ गते)



; DkfbSlo

@) *) efb!! , C^\$!!%, Jif%

संसद चायके बियमः

प्रमुख प्रतिपक्ष दल एमाले 'लुँकाण्ड' ख्य उच्च स्तरीय छानबिन समिति दय्केमः धायगु माग तयो श्रावण १० गते निसें संसद चलय याके मब्यूनि । सदनय् नुवाय मःगु यक्व यक्व विषयत दः अथेनं एमाले याडः छम्हा हे सांसदपिसं न्वचु तय मखानि । जनताया प्रतिनिधिपिसं नुवाय मखांगु धायगु सासंदपिनिगु नुवायगु हक लुटे यागु खः ।

संसद सत्तापक्षं यागु मभिं ज्याया पापु प्वलः क्यनयगु थाय् खः । सरकार मखु लायैं वानय् तांसा उकिया विरोध वा कुखिडः सचेत याकयगु थाय् खः, थ यत्थे मयाकय्ता पानयगु थाय् खः । थजगु ज्या प्रतिपक्षं याइगु खः । अलय् थाना धःसा प्रतिपक्षं हे सदन चलय् याकय् मबिइगु । गनां सुयायगुं सः हे तय्के मब्यूसा आना प्रजातन्त्रता हेपे यागु थें जुइ ।

एमालेया माग सत्ता गाठीचिड च्वंगु दलया सरकारं मज्यू दक धाय् धुंकगु दः । थजगु इलय नं सदन चायके वियमखु दक जिद्वी याडः च्वंसा एमालेयायगु बदनाम जुजुं वानि । सत्ता गठनबन्धन तमज्यातलय् एमाले नपांया सरकार पलिस्था याय् फैगु हे मखु । एमाले सरकारय् वानय्ता सदन चायके मबियगु लाँपु ज्वड वांगु थःता हे काथं मछिडः वानिगु खः ।

खुसी बःलं ल्हाड, पहाड न्ह्याडः वाडः अपलं धन जनया क्षति जुयो च्वंगु दः । अपलं ताँ व लाँत चुइकः यंकल । अजगु दुःख सियो च्वंपु जनताया दुःखं थाकाय् मःगु नपां थाय् थासय् गुलि स्यना धायगु ल्या ततं राहत इडः बियमःगु नपां ल्हवनय् कानय् मथां याय मःगु खः । थजगु संकटया इलय हे जनतां जनप्रतिनिधिपिन्ता लुमांकिगु खः । अमिपाखं आशा याइगु खः । जनताया दुःखया खाँ थः पुं जनप्रतिनिधिपिसं छुं हे नुवाड मब्यूसा जनतात तँचाई । थुकिया जिम्मेवारी नं एमाले हे काय् मः ।

ई नपां देशय् अनेक अपराधिक ज्यात जुयफः । अजगु फुक्क घटनाता कायो संसद चायके मबियगु खः सा संसद धायगु मःगुला, म्वःगुला दक न्ह्यसः थानय् फः । सरकारया मभिं, मचः मगागु खाँयाता ज्वड जनताता ध्वाथुइके बियो जनमत थःदखय् लाकय्ता स्वयमःगु प्रमुख प्रतिपक्षया धर्मनं खः कर्तव्य नं खः । अलय बलं ध्वाड सदन चायके मबियो ज्याभः काथं छ्यलयगु धःसा न्ह्याकातं स्वसां मिलय मजु ।

नक्कली भुटानी शरणार्थी काण्ड, सयकिलो लुँ काण्ड, पशुपतिया जलहरीया लुँ काण्ड थजगु विषयया खायैं सांसदपिसं संसदय नुवागुलिं हे अपलं जनतां उकियाय् बारे खाँ थुला । अकि सुसु लाता अलय् छु छु दलयायपुं लाता धायगु मेगु खाँ जुल । मू खाँ यां देशय जुयो च्वंगु भ्रष्टाचारया खाँ जनतां थुल । थव प्रजातन्त्रया वांलागु पक्ष खः ।

अः सी बी आइं 'लुँ काण्डया' खाँ छानबिन याडः च्वंगु दः । सत्ता गठबन्धन दलं उच्चस्तरीय समिति मदय्केगु खाँ तप्यंक धाय् धुंकः नं सदन चायके मबियगु खःसा जनताया करं तलब सुविधा कायो च्वंपुं सासदपुं व मन्त्रीपिनिगु सुविधा नं काय् ज्यूला मज्यूला दक न्ह्यसः मदानि मखु । इलय हे बिचः याडः सदन चायकसा बांला जुइ ।

पिकाक-ख्वप नगरपालिका/सम्पादक-आशाकुमार चिकंबञ्जार, डेस्कटप-धन लक्ष्मी त्यात, आवरण सज्जा-रेणु ध्वज्, थाकू- भक्तपुर अफसेट प्रिन्टर्स फोन ल्या: ०१-६६१३०४३, इ-मेल- khwopapau@gmail.com

सचिव हिंडागृगु खप पौ. बःछि पौ(पाद्धिक)

चीन यात्रा

नारायणमान बिजुवठें (रोहित)

न्हयःगूक्वति चिनियाँ जनताया तः छांगु दे



न्हयःगू क्वति जनता दःगु तःहांगु दे चीन मानव सभ्यताया मिखालं स्वयबलय् छगू महत्वपूर्ण महादेश खः। थव डागुलाख दाँ हाँ या ‘पेकिंग मानवया’ जन्म स्थल नं खः। यक्व न्हपा अथे धाय् प्राचीन इलय् हे चीनं हे भवँ, छापा, (थाकु), चुम्बक, बारूद, भवखा ब्वइगु सद्केत याइगु यन्त्रत हलिमय दकलय् न्हपां लुइकः आविष्कार यागु खः। नपां चीन थौं तक नं चिया, रेशम थजगु कापया लागिं नां जः। अः तक नं चीनय् मानव विकास व मानव सभ्यताया विषय बांलाकः ध्वाथुइकः सय्के सिइकेता मःगु आदिम मनूतय् गु (क्वँ) हाड-खोर, वाँ, कपः, अमिसं ज्या छ्यलय हःगु ल्वहँया ज्या भःत नपां तस्कं पुलांपुलांगु इलय्या थीथी जातया थीथी काथंया ताजा-ताजि जलथलया प्राणीपिनिगु जीवावशेषत नं तस्कं सुरक्षित याडः तयो तःगु दः। अजगु वस्तुत प्राणी विज्ञान व जीव विज्ञान अलय मानव समाज विकासया विषय ब्वनय्ता थुइकेता अपलं ग्राहाली जुई। थव बाहेकं चीनं कलाखय् नं तच्वतं चवजाय्क यंकगु खानय् दः। चीनया धात्ये धात्येंग मू मू सहरय् चवंगु पुलां

पुलांगु देगः महल व दरवारय् चवंगु सिँ व ल्वहँ अलय् धातुया कलात्मक वस्तुत स्वय बलय् सिय दः कि पुलांगु प्राचीन चीनं विज्ञान, चिकित्साशास्त्र, गणित, भाषा व साहित्यखय् नं अपलं चवजायकः चवंगु जयो चवना। चीनया प्राचीन चिकित्सा शास्त्रया ‘चञ्च्च्य’ (मुलुखं तियो याइगु उपचार अकुपञ्चर), मेडिटेशन (ध्यान याइगु) थजगु विषय नं थौं नं चीनिया चिकित्सा विज्ञानता ग्राहाली याडः चवंगु दः। बौद्ध धर्म काथं स्वयगु खः सा नं चीन छगू महत्वं जःगू महादेश खः।

चीनं धयसूयो डालः तःगु क्षेत्रफल ९६ लाख वर्ग किलोमिटरदः, गुगु धात्ये धाय् गु खः सा फुक्क युरोप याय् गु ति दः। थुकिया पूर्ण पाखय् १४ हजार किलोमिटर ता: हाकगु नागबेली लगु समुद्रया सिई (किनार) दः। ताइवान, हाइनान, मकाओ थजगु न्हयद्व स्वयो अपः टापुत प्रशान्त महासागरय् डाडः वाडः चवंगु दः। उलिमध्ये ताइवान व हाइनान दकलय तः हांगु खः। चीनया दकलय् तहांगु खुसीत मध्ये हवाड़ हो व याइत्सी खुसी खः। चीनया दकलय् तः ब्यागु तःहांगु, तहांगु खुसी हवाड़ हो खः। गुकिता भीसं भूगोलय् ‘चीनया दुर्भाग्य’ दक धः काथं ब्वडः वया।

चीनय् सुपायँचाय् थ्यूगू द्वलंद्व पहाड़ पर्वतत व थी थी पह या वाउँगु गूँ (जद्गाल) त, लुँये सइगु वा बुँ याइगु हजारौं कोसया माथांगु जगगात, अपलं अपः खुसीत दःगु देश खः। अजगु खुसी व इवाला (झरना) खय् अपलं विजुली पिकाय् गु शक्ति लुकुं विडः चवंगु दः। अलय चीनया प्वाथय् ताजि-ताजिया बहमुल्य खनिजत दुडः चवंगु दः।

चीनया न्हयःद्व क्वति (७० करोड) जनतात मध्ये हान जाति मुख्य जाति खः। चीनय् डाय् गु स्वयो अपः अल्पसंख्यक (म्हवचा जक दःपुं) जाति त दः। अजपूं म्हवचा जक ल्या दःपुं जनता ३ करोड ८० लाख दः। अजपूं जातित मध्ये मंगोल, हुई, तिब्बती बेबुर, माऊ, ई, पुई, कोरियाई मंचु थजपुं खः।

आदिम सभ्यताया ताकी गयो थाहँवगु, थीथी काथंया वैज्ञानिक वस्तुया आविष्कार याइपूं अपलं दार्शनिकपुं, राजनीतिज्ञ, कलाकार व साहित्यकार पिनिगु जन्म भूमि चीन यक्व तः ब्यागु देश खः। वीर चिनियाँ जनतां थःगु राष्ट्रिय स्वतन्त्रता व मुक्तिया

निंति १०९ दा तक मग्यासें वीरतापूर्वक ल्वाडः १९४९ य् चिनियाँ कम्युनिष्ट पार्टी या न्ह्यलुवाय् जनतां त्याकः काला ।

चीन अः ज्यासाडः नैपुं ज्यामि (मजदुर) वर्गया न्ह्लुवाय् हज्याडः च्वंगु दः । आना शोषणया व्यबस्था न्हांकः समाजवाद पलिस्था याय्गु ज्याखय् थाकु अःपु मधः सें ज्यान पाडः ज्या साडः च्वंगु दः । चीनया फुक्क काथंया धर्म डालः च्वंपु नं दः । गुगुथासय् फुक्क सिनं प्रजातान्त्रिक अधिकारत कायो च्वंगु दः ।

अध्यक्ष (नायो भाजु) माओत्सेतुडग चिनियाँ जनताया सकसिया योम्हा महान नेता खः ।

पेकिङ्ग

पेकिङ्ग चीनया तस्कं पुलांगु प्राचीन नगर व राजधानी नं खः । थुकिया पुलांगु नां ‘येनचिङ्ग’ खः । लिपा थाना मिंग वंश राज्य यासेलिं अथेधाय् थुकिता राजधानी यासेलिं थुकिता ‘पिंगिं’ अथे धाय्गु ‘उत्तरी शान्ति’ जक धाला । १९४९ या न्हापांगु अक्टोवरय् पेकिङ्गता हे नयाँ जनवादी सरकारया राजधानी जक क्वः छिता । चिनियाँ तय्सं अःनं पेकिङ्गता ‘पेचिङ्ग’ जक धाई ।

पहः (स्थिति) पेकिङ्ग ३९ डिग्री ५५' उत्तरी आक्षांश व ११६ डिग्री २५' पूर्व देशान्तरय् चीन महादेशया उत्तर पाखय् ला । थव समुद्री सतहं ४४.३८ मिटर च्वय ला । पेकिङ्गया माथांगु जग्गाया (मैदानया) उत्तर, पूर्व व पश्चिमपाखय् पहाडत दः ।


जनवादी चीनया थुगु राजधानी पेकिङ्गता संसारं सांस्कृतिक रूपं म्हासिङ्क वयो च्वंगु दः । गुकि इतिहास ३००० हजार दा स्वयो ताः हाकगु इतिहास दः । थव तस्कं पुलांगु प्राचीन नगर जुगुलिं अःनं पुलांगु राजमहल, देगः, दरवार, हाय्युपुकय्गु (आमोद-प्रमोद याय्गु) पुखु-तालत, किबात यक्व यक्व दः । व पुलांपुलांगु महल व देगलय् अःनं प्राचीन कलाया च्वजः गु नमूनात ब्वस्यलागु, स्वय लाइकगु यक्व यक्व दः । गुगु चीनया लाहा ज्वःपुं कुशल कालीगढपिसं कियो तःगु खः । पेकिङ्ग पुलांगु सहर जुगुलिं थाय्थासय पुलां-पुलांगु पःखः, ध्वाकात नं दः । व फुक्क न्हपा शहरया सुरक्षाया लागिं दय्कः तःगु खः । अलय् पेकिङ्गं ई (युग) नपां थःनं बुलुहुँ हिलः वयो च्वंगु दः सर्पं नं त्व थें ।

न्हपा अर्थिक व सांस्कृतिक कांयं पेकिङ्ग तस्कं लिपा लागु नगर खः । गना छूँ हे उत्पादन जुइगु मखु । नगरय् न्हूँ न्हूँगु कल कारखाना व उद्योगया नां तक हे मरु । अलय् १९४९ या जनक्रान्तिलिपा पेकिङ्गं थःथाय् बांला, तस्कं बांलाक छाय् प्यूगु जक मखु राष्ट्रिय अर्थतन्त्र च्वजाय्केगु नपां नपां पेकिङ्गं धातु शोधन (धातु गालय्गु) ज्या, शक्ति (बिजुली कोइला आदि) कल

सचिष्ठत हिंडागूगु र्खप पौ. बःछि पौ(पाद्धिक)

कारखानात तय्गु, भवन द्यक्केगु, रसायन, काप, थजगु हरेक लागाय् यक्व चतारं हज्याक यंकला ।

क्रान्तिया इलय पेकिङ्गया औद्योगिक उत्पादनया मू १७ करोड युआन दःगु खःसा आना ७० द्व ज्यामितय्सं ज्या सानिगु खः अलय् १९५९ तक खय् पेकिङ्गया औद्योगिक व हस्तकला उत्पादनया मू ४ अरब ६० करोड युआन थ्यन । गुगु १९४९खय् स्वयो २७ गुणा अप्वः खः ज्या सानिपुं द, ७०,००० स्वयो अपः थ्यन गुगु १९४९स्वयो १२ गुणा अपः खः । क्रान्तिया इलय पेकिङ्गय् छगू नं इस्पात कारखाना मरु । अलय् न्हपांगु पञ्चवर्षीय योजनाखय् २८,००० टन उत्पादन याता गुगु १९५८ तकखय् १,६०,०००टन थ्यन । उकिमध्ये नं १,२०,००० टन न्हूँगु तरिकां उत्पादन यागु खः । १९४९ य् काचिंगु न्या २६००० टन जक उत्पादन जुइगु गुगु १९५८ खय् ५,२०,००० टन थ्यन । थुगु ल्या १९४९ स्वयो २० गुणा (नी दुगं) अपः खः । अथेहे कोइला दाच्छिया उत्पादन ११ लाख १८ हजार टन दःगु खः । उब्ले फुक्व ज्या मनुया लाहातं हे याइगु न्हूँ न्हूँगु



नारायणगां विजुवर्णे

सामानत मरु। अलय् क्रान्तिलिपा न्हूं न्हूंगु माल सामान व कलपुर्जापाखं ज्या कःसेलिं १९५८ तकखय् ४० लाख ६० हजार टन उत्पादन याता गुगु १९४९ स्वयो प्पदुंगं अपः खः। पेकिड्गय न्हपा मेरिनया ज्याभः (औजारत), रेडियो सामानत, कपार्येया माल सामानत, नपां मेमेगु रासायनिक उनयाय्गु व रेशमी काप, बिजुलीया समानत अपलं उत्पादन याडः हःगु दः।

क्रान्तिया इलय जगगाखय् सामन्तवादी स्वामित्व प्रथां व पुलांगु पहलं हे बुँज्या याइगुलिं बूं अन्न म्हवचा जक सइगु। नाछ्यगु २०८ प्रतिशत जगगाखय् जक दता। अलय १९५८ खय कम्यून दय धुकः ४९० ट्रेक्टर व मेमेगु न्हूं न्हूंगु मेसिनतः हयो नाः छुयगु व्यवस्था यात। थ्यं मथ्यं एक माऊ (१ माऊया १/३ एकड वा थ्यं मथ्यं स्वपिति) खय ३१८ क्याटिज उत्पादन यागु खः। बूँयाय् ज्यूगु आबादी जगगाखय् १/३ ब्व स्वयो अपः जगगाखय् बांलाक नाः छुयगु व्यवस्था दय धुकंगु जुल।

कपार्य १९५८ खय छ्गु माऊ खय ६० क्याटिज हवय्कला अलय १९४९ य् छ्गु माऊ खय १६ क्याटिज जक हवयकगु खः। १९४९ स्वयो १९५८ खय स्वदुंग कपार्य थवय् दत।

नाः छुय मखाड बूं कःसिथें गांकय् मबियता १९५८ खय कम्यून वगती नाः:

मुनिगु ९० गः तःहांगु चिच्याहांगु पुखु म्हुला। उगु पुखुली २३ लाख ७० हजार माऊ, बुँ नाः छुय फै गना १९५७ खय ४८ लाख ८० हजार माऊ जक नाः छुय दता। पुखु दःसेलिं नाः छुय दयो बूं अपलं अन्न सय्के फैगु अलय कःसि थें मजुइगु नपां वर्षा खुसी बःथें वाड पाँ न्ह्याडः मवानिगु नं जुल।

तः तः खागु भवन दानय्गुलि क्रान्तिलिपा पेकिड्गं यक्व यक्व हज्यागु खानय् दः। १९५८ खय १.३ गुणा अपः छूं दान, उकिया मतलब २,७२,४०,००० वर्गमिटर स्वयो म्हवचा मजु। क्रान्ति हाँ २१,९०,००० वर्गमिटर लाँ पिच यागु खःसा १९५९ तकखय १,०८, १०,००० स्ववायर मिटर लाँ दय्कला।

१९४९ य् मजदुर व मे मेगु अफिसय ज्या सानिपुं ज्यामितय्गु ल्या ४,३०,००० दःगु खःसा १९५८ खय १६,२०,००० थ्यन।

सचिष्ठत हिंडागूगु ख्वप पौ. बःछि पौ(पाक्षिक)

औद्योगिक कामदार (ज्यामित) पुं क्रान्तिया इलय स्वयो ७० गुणा (न्हयःदुंग) अप्वः दतसा किसानतय्गु आमदानी २०० प्रतिशत अप्व दःगु जुल।

क्रान्तिलिपा पेकिड्गं उद्योग, कृषि व निर्माणया ज्याखय् जक मखु शिक्षा व संस्कृतिखय् नं अपलं हज्यागु खानय् दः। प्राथमिक, मिडिल व नर्मल ब्वनयकुथित, कलेज व विश्व विद्यालयया ब्वनामिपिनिगु ल्या व डाक्टर व उपचारया लागिं अस्पतालया व्यवस्था १९४९ व १९५८ खय् गुलि हज्याता धाय्गु व्यवस्था धलः खं क्यं:

	ल्या १९४९ य्	ल्या १९५८	अप्वगु
१. प्राथमिक स्कूल	३,२०,०००	९,९६,०००	स्वदुंग
२. मिडिल व नर्मल स्कूल	४३,०००	२,६७,०००	खुदुंग
३. कलेज व विश्व विद्यालयया	१४,०००	१,१०,०००	च्यादुंग
४. डाक्टर - वैद्य पिनिगु ल्या	४०००	३०,००० न्हयदुंग स्वयो अप	
५. अस्पतालया शैया	३०००	२१,०००	न्हयदुंग

स्कूल कलेज विश्वविद्यालय व मेडिकल अफिसरत अप्वलं दःगु नपां संकिया, प्याखं (छधा: पूधा) नपां मेमेगु सांस्कृतिक केन्द्रत नं अपलं दय्के धुकंगु जुल।

च्यव च्यवया काथंया उद्योग, कृषि, निर्माण व सांकृतिक ल्याखं सिइके फः किं क्रान्तिलिपा पेकिड्ग न्हम्हा भौमचा थें अथे धाय् पेकिड् हिल हयाम्हा थें बांलात। द्वलंद्व न्हूंगु भवन व कोसाँ न्हूं न्हूंगु लाँ दय्कल।

न्हपा याय्गु गल्ली गल्ली थजगु लाँ तब्याकः जवं खवंया पुलां पुलांगु छूं त थुड न्हूं न्हूं (भवन) दाडः हल। नपां न्हपायाय्गु कला कृति जःगु दरवारत देगः त बाहेकं क्रान्तिया हिगु थासय् स्वय लाइकगु थाय्त दय्के धुकंगु जुल। पेहिड्गय् पुलांपुलांगु स्वय लाइकगु थाय्त मध्ये शाही महल (कुकुड), पेहिड्पार्क, थेन थान (स्वर्ग देगः) इहां युनान, (वर्षाकालीन दरवार) त खः अलय २०८ दय्कगुलि जनसभाभवन (कंग्रेसहल), ऐतिहासिक अजायवधर (म्युजियम) जातीय प्रदर्शनी भवन, कृषि, मुक्तिसेना, जीव प्राणी विज्ञानया अजायवधरत पेकिड्ग रेलवे स्टेशन, रेडियो व टेलिभिजन स्टेशन खः।

संसदं बांलागु लिच्वः लाकय् रम्फूगुया रवायঁ

विवेक

नहुँगु संविधानं स्वंग् तहया सरकारया व्यवस्था याडः तःगु दः । संघ, प्रदेश व स्थानीय तह सञ्चालन विधि नं संविधान बांलाक हे कवः छिडः ब्यूगु दः । स्वंगूतं तह थःथःगु लागाय् च्वडः मःमःगु ऐन, नियम, विनियम दय्के फैगु याडः संविधानय् हे अधिकारया धलः हे पिब्बयो तःगु दः । थुकाथं संविधानया दुनय च्वडः स्वंग् तहया सरकार तय्सं सुयाय्गु दवाव व हस्तक्षेपय् मच्वंसे कानून दय्केता स्वतन्त्र धाय्गु खाँ सिय्दः ।

केन्द्रसं कानून दय्केता प्रतिनिधिसभा व राष्ट्रिय सभा याडः नेगु सदनात्मक व्यवस्था दः । नेगु सभां पारित यागु विधेयक राष्ट्रपतिं प्रमाणित यातकिं ऐन जुई । प्रतिनिधिसभा व राष्ट्रिय सभाया दुजः पिनिगु मू ज्या धाय्गु देया निंति मःगु ऐन कानून दय्केगु खः । दय्कः तःगु ऐनत ई काथं जनताया भिं जुइगु स्वयो हिङ्केगु, नपां संसदय् जनताया समस्या ब्वय्गु नपां सरकारया बार्षिक बजेट पारित याय्गु नं सांसदपिनिगु मेगु मू ज्या खः । अजगु जिम्मेवारी पु वांकय्ता भीपुं ग्वः म्हा सांसदपु तः ला लय् ? थव थौं या मू खाँ खः ।

संसदीय ज्या इवःत प्रत्यक्ष प्रसारण यासेलिं जनता आना छु जुयो च्वना धाय्गु खाँ सिइके दत । सांसदपुं हाजिरजक याडः प्याहाँ ब्रानिगु, संसद् चलय् जुयो च्वबलय् मोबाइल साडः च्वनिगु, खाँ ल्हाडः च्वनिगु, छुं खाँ मसिकनं यो योगु नुवाइगु खाँत जनतां तप्यंक स्वयो च्वंगु दः, प्रतिनिधि सभा व राष्ट्रिय सभाया दुजः पुं मध्ये १० म्हा १२ म्हाति सांसदपुं जक सदनय् जिम्मेवार जुयो नुवाइगु व संसदय् तयारी जुयो वैगु खानय् दः । वयक सांसदपिसं जक प्रधानमन्त्री, मन्त्रीपिन्ता ग्यसुलागु न्ह्यसः तैगु, छगु छगु घटनायाता कायो थःगु पार्टीया बिचः प्वकिगु,

राष्ट्रिय व अन्तरराष्ट्रिय विषयलय दुयंक अध्ययन याडः विषयस्तु पिब्बयगु याडः च्वंगु दः । अपलं विषयलय् नेपाल मजदुर किसान पार्टीया सांसद याकचां अजगु न्ह्यसः तयो च्वंगु खानय् दः ।

गुलिं सांसदपिसं कानूनं धायो तःगु ज्या याय्गु स्वयो गैर सरकारी संस्था (एनजिओ) व अन्तरराष्ट्रिय गैर सरकारी संस्था (आइ एन जि ओ) या बैठकय् व्वति काय्ता लिइमलाक जुइगु । छम्हसिता सःतगु थासय् भविष्यिवाडः नः वानय्ता नं लिफः मस्व । भीपुं सांसदपुं । बैठक छु खाँ सःतःगु धाय्गु खाँतक हे मथुइकः ब्वतिकःवानि, मन्त्रीतय्सं छगु न्ह्यसः तःसा मेगु लिसः बिङ्गु अथेनं नेपः मिपिसं माननीय जू व मन्त्री जु धाय माल च्वंगु दः ।

संसद न्ह्याडः च्वंगु इलय सुं आई ऐन जि औं बैठक सःतःसा सांसदय् स्वयो ऐन जि ओया ज्या इवःख्य् अपलं सांसदपुं ब्वतिकः वानिगु बुखाँ तःक हे प्याहाँ वयं धुंकगु खः। सांसदय् गणपूरक ल्या मगाडः विधेयक पारित जुय मफूगु इलय छगु पॅक्तारे होटेलय् दर्जनौ सांसदपुं मुडः च्वंगु खाँ उब्ले अपलं ब्यबय जुगु खः । छुं नेपःमि पिसं वयक सांसदपिन्ता एनजिओ ख्य वानय्ता त्याक छ्वगु खः ला ? धात्ये माननीय जुयता जनताया भावना थू पुं न्ह्याब्ले जनताया पा जुइपुं जनताया समस्या ज्यंकय्ता न्ह्याब्ले संसदय् वैपुं नपां जनताया भिं जुइगु कानून दयकेगुलि बःयाइपुं अलय देश व जनताता भिंयाइगु कानून दय्के तांसा आना याकचां जुसां विरोध याय्गु आँट व साहास दःपु जुयमः ।

लोकपत्यार याय्थें नां छक काय्केता खः थे डांकः छक विरोध याइगु लिपा पार्टी क्वः छिगु खाँ धायो देशघाटी

विधेयक पारित यायता लाहा थानिपुं धोकेबाज व फटाहात माननीय धाय लाइकः मजु । एमसीसीया खाँ दे ब्याकः ब्यबय जुयो च्वंगु इलय् माओवादी नेता नारायण काजी श्रेष्ठ नपांया मनूतय्सं तःक हे सावर्जनिक काथं हे उकिया विरोधयाडः धःगु खः- ‘एमसीसी छुं नं हालतय पास याकय बिय मखु’ । अलय थःगु हे पार्टी पारितयाय्ता हछ्या बल्य वं म्वसः छथु हे मतः । व हे थौं गृहमन्त्री जुयो च्वंगु दः । बालुवाटार काण्ड, नक्कली भुटानी शरणाथी काण्डया फाइल पिकायो ब्य ब्य जूसां छगु क्विन्टल लुँ काण्ड ख्य धःसा व थः हे विवादय् लाडः च्वंगु दः ।

सांसद व मन्त्रीपुं संसदय् जिम्मेबार जुयो पिब्बय मफूगु हे देया समस्या खः । देयानितिं मदयकः मगागु कानून इलय् हे दय्के मफयो थौं गुलिं थाय ‘लथालिड्ग देया भताभुड्ग चाला’ जुयो च्वंगु दः । व सांसदपिसं तन्ता याय्मःगु विषय मखुला ? गैडाया छें भुड च्यंपुं थन्योपुं भीपुं सांसदपिन्के गुब्ले मति बुयो वैगु ज्वी ?

कावून दय्केगुलि सांसद पिनिगु लाहा ज्व ?

२०७४ साल लिपा संविधान काथं संघीयता छ्यलय् धुंसां संघ अन्तरगतया कर्मचारी पिनिगु समायोजनया ज्या अजनं क्व मचः निः । लाखाँ कर्मचारी पिनिगु भविष्यनपां स्वाड च्वंगु निजामति कर्मचारी विधेयक नपां अपलं मेगु मदयक मगागु विधेयकत अजनं संसदय् पिब्बय् हःगु मरुनि । गुकिं संघ, प्रदेश व स्थानीय तहलय ज्यासाड च्वंपुं कर्मचारीपुं छुखः धा धां अन्योलय लाडः च्वंगु दः । संघीयता छ्यःगु खुदा फुय धुडानं लाखाँ कर्मचारी पिनिगु भविष्यः स्वाडः च्वंगु निजामति कानून मदय्कगुलि

सचिष्ठत हिंडागृगु ख्वप पौ. बःछि पौ(पाद्धिक)

धात्थें सरकार जक दोषी खःला ? व खाँ बारंबारं न्हिथाडः मयासें मगाकः हालय् गु ज्या सांसदपिनिगु मखुला ?

संघीय शिक्षा ऐन मदय्कगुलिं अः देशां देखिया शैक्षिक लागा अखय्ला थखय्ला मदयो च्वंगु दः। सविधानं मा.वि. तगिंतकया फुक्क अधिकार स्थानीय तहता बियो तःगु दः। अलय् संघ सरकारहिंगु तगिनिसें च्वयया तह लाक कायो च्वंगु दः। सविधानय् संघ, प्रदेश व स्थानीय तहया मंकः धलः खय् छु छु च्वयो तःगु दः? उकियाय् खाँ छाय् संसदं कानुन मदय्कला ? धाय् गु न्ह्यसः दानिगुलि अजु चाय् म्वः।

नेपः या च्वयया शिक्षा काय् गुलि थानाया ब्वनामिपिनिगु विश्वास न्हिया न्हिथं मदयो वांगु दः। देशय् दुनय् चायकः तःगु १४४० गू कलेज त मध्ये थुगुसी जक ५४० गू स्वयो अपः कलेजत तिय मालिगु अवस्थाय् थ्यंगु बुखाँ प्याहाँ वयो च्वंगु दः। च्वयया शिक्षा ब्वनय्ता १ लाख व हिंडम्हा ब्वनामिपु विदेशय् ब्वनय्ता नो अब्जेक्सन लेटर काय धुंकगु खाँ पिब्वयो च्वंगु दः। व ब्वनामिपिन्ता नेपालय् हे भिंकः शिक्षा बियता अलय् नेपालय्सं च्वनय् गु व्यवस्था यायता मःगु कानुन दय्केगुलि भीपुं सांसद पिसं बिचः याय् मःगु खः।

ब्वनामिपुं मरुगु कलेजत, देसि सः, मदय्क पिगु वा, दाय॑ ३ खर्ब तकाया नसा ज्वलं (कृषि वस्तु) विदेशं न्याडः हय् मःगु बुखाँ पाखं भी सांसद पिनिगु मन गथे क्वमसाला ? न्ह्यागु हे पार्टी याय् पुं सांसद जूसां नं जनताया पालिडः सः तय् गु सांसद पिनिगु ज्या खः। न्ह्याब्लें संसदया कुर्सी खाली जुइकः न्ह्याकः च्वंगु संसदयाय् खाय॑ जनतां स्वयो क्वः छिडः ल्य ज्या याडः च्वंगु दः।

संसदय् थांगु पंगः सरकारय् वानय् नर्खांगु छठपठी

संसदं न्वचु तय दैगु अधिकार नपां लिकुंकः प्रतिपक्ष दलयाय् पिसं छुं छगु त्वहः दत्किं प्रधानमन्त्रीया राजिनामा फवनि।

अलय् राजिनामा मब्यूतलय् संसद हज्याकय् मवियगु खाँ क्वः छिई। अजगु दलं प्रतिनिधि सभा व राष्ट्रिय सभा बन्द याई, अलय् गोप्य बैठक याई नपां खाँ मिलय याई। मेमेगु दलत नं संसदय् दः धाय् गु मतलब नं याई मखु। प्रधान मन्त्री पुष्पकमल दाहालं छगू ज्या इवः सं ‘थः ता प्रधानमन्त्री भारतं दयकगु’ आशयया धात्थेंगु खाँ पिब्वयवं प्रधानमन्त्री राजिनामा मब्यूतलय् संसद चलय् मयाय् गु खाय॑ अपुं मिलय् जूला व जनतां मस्यू। धात्थें धाय् गु खः सा संसद चलय् मजुइगु सांसदपिनिगु नुवायगु हकलाकः काय् गु खः। छगू काथं व सांसदपिन्ता यागु अन्याय खः। अः थव एमाले याडः च्वंगु खः सा शासक दल तय्सं इलय् ब्यलय् तः क हे याय् धुंकगु खः।

प्रधानमन्त्रीया राजिनामा फवनय्ता छगू प्रक्रिया वा विधि दः। अजगु विधि व प्रक्रिया पू मवांकः न्ह्याम्हासिन राजिनामा फवंसां प्रधानमन्त्री व मन्त्री राजिनामा बिइ मखु। संसदय् बहुमत मरु तलय् न्ह्याम्हा प्रधानमन्त्री वैगु सम्भावना नं मरु। गनातक नैतिकता या खाँ दः व प्रधानमन्त्री व मन्त्रीपिसं थः थमं मति तैगु खाँ खः। संसद चलय् याकय् मखु धाय् गु एमालेया खाँ नं सरकारय् वानय् मखाडः वाथावाथा काड च्वंगु जक खः। एमालेया न्ह्याथय् याड जूसां अः याय् गु सरकार क्वथय् गु मति ज्या साडः च्वंगु खः। अलय् नेपाली कांग्रेसया गवाहाली मदय्क व याय् फैमखु। कांग्रेसं थः स्वयो यक्व कमजोरम्हा माओवादीता सरकारया न्ह्यलुवायाडः संध व न्ह्यगुंतुं प्रदेशय् सरकार चलय् याय् खांगु त्वःतः एमाले मति तः थे अः याय् गु सरकार उलि मथं अःपुक क्व दैगु सम्भावनानं मरु।

संसदय् नेमकिपाया भूमिका

नेपाल मजदुर किसान पाटी निर्वाचनया इलय जनताकय् सदनय् प्रखर प्रतिपक्ष जुयो च्वनय् धायो मत फ्वंगु खः। पार्टी पाखं त्याकपुं सांसदपिसं जनताता ब्यूगु बचन काथं ज्या साड दिल। न्हपा न्हपा

का. रोहितया न्ह्यलुवाय् पार्टीया सांसदपिस सरकार बिइगु सांसदया पेन्सन, पजेरो सुविधा बिइगु नीतिया विरोध याडः दिल। लगानी बोर्ड विधेयक, महाकाली सन्धी थजगु देशघाती विधेयक व सन्धी सम्भौताया विरोध याडः दिल। अः संघीय सांसदे पार्टीया छम्हाजक सांसद प्रेम सुवाल दी। वयकलं पार्टीया नीति निर्देशन काथं जनपक्षीय कानून दय्केगुली बःयाडः वयो च्वंगु दः। वयक याकचा जक जुसां जनताता भिंमयाइगु विधेयकत व अन्तरराष्ट्रिय सन्धी सम्भौताया विरोध याडः च्वंगु दः। एमसीसी, एसपीपी व नागरिकता विधेयकया विरुद्धय जुगू आन्दोलन दे डांकः अपलं चर्चाया विषय जुल। अःतिनि अपलं मनूतयसं धायो हला-“संसदया फुक्क दलत छखय नेमकिपा छखय तयो लाडः स्वसा नेमकिपा हे अपलं इयातुइगु जुल।” गुलिसिन घाला - ‘नेमकिपा मरुसा संसद संसद थे हे च्वनि मखु।’ संसदय् च्वंडः च्वंपु शासक दलयाय् पिनि धःसा नेमकिपा छगू मरुसां ज्यू दक च्वड च्वना। प्रतिनिधिसभाय् तीन प्रतिशत व प्रदेशसभाय् साढे एक प्रतिशत मत कायफःपिन्ता जक राष्ट्रिय व प्रदेश पार्टीया मान्यता बियगु कानुनी प्रावधान नेमकिपा थजगु देशभक्त व क्रान्तिकारी पार्टीतय्ता संसदय् दुमकाय् गु जः काथं हःगु खः। अलय् अमिसं मति तः थे नेमकिपाता संसदय् वानय्ता सुननं पानय् फै मखु। थुगु खाँ जनतां तः क हे त्याकः छ्वयो क्यनय् धुंकगु दः।

नेमकिपाया सांसदपिसं इमानदार जुयो थः ता ब्युगु जिम्मा पूवांक साडः वगु दः। पार्टी तः हां चिच्याहां जुयफः अलय् इमान्दार जुयो देश व जनताया सेवा याय् गु ति तहांगु मेगु छुं मरु। नेमकिपां क्यडः च्वंगु लाँपु थव हे खः। नेमकिपा कायो च्वंगु इज्जत व प्रतिष्ठानं थव हे खः। थव हे लाँपु कः घाडः शासक दलपिसं यागु छगू छगू जनविरोधी ज्यात जनताया हःनय् भूरी ल्हवयो क्यनय् गु थौया क्रान्तिकारी जनतां याय् मः व अमिगु कर्तव्य नं खः।

सचिष्ठत हिंडागृगु ख्वप पौ. बःछि पौ(पाद्धिक)

जि न्हयलं बिस्युं वइगु हे

इमिगु दकलय् तःधंगु छगु प्रहार रवः

पूर्ण वैद्य

जितः ल्यूवयाच्वन थौं, तुति तुति मजुइक
तुति मदुपिसं -

जितः न्यंका वयाच्वन थौं, न्हाय्‌पं न्हाय्‌पं मजुइक
न्हाय्‌पं मदुपिसं -

जिगु म्ये स्वाहायेकेत वयाच्वन

जिगु छ्यं लाकः वयाच्वन छ्यनं छ्यं मजुइक

छ्यं हे मदुपिसं -

छगु अदृश्य ल्हाः तुति

छगु अनाकृति आकृति

परम्पराया देगलय् जिं हे पुजा यानातया: म्ह द्यवं

संस्कारया मूर्ति जिं हे श्रद्धा तयातयागु तुति

थौं जिगु हे छ्यनय् जुनाः नुगः-स्वँ

चः चः पुया: नयेत स्वयाच्वन ।

जिं म्ये हाला नकतिनि थ्यना तयापिं मचातय्

भीगु दुःखया कै-ज्वः वइ थें च्वंपि मचातय्

न्ह्यः हे पिचायेक इमिगु म्हगस हे चः चः बुक

थव चान्हे सुनां हानं कोर्दाकि कोर्दा दाया: पितिनाच्वन ?

‘सितला माजु’ या सः थवयाच्वन थौं हानं

जिगु अन्तर अन्तर मर्मय्

छगु दृढ सलं जिगु म्हछिं पाहाँ चः हे थवयाच्वन

‘छन्हु दिन वइतिनि, सिकपनि दनितिनि’

मि तिकि थें इतिहासया चुइचुइं पूगु खविं

थौं जिगु हिङ्ग तप तप लानाच्वन ।

म्हछिं भुनाच्वंगु न्ह्यः प्वा: प्वा: गना वनाच्वन जिके

ज्वः गु निभालं चातः चातः खसु हवगना वं थें ।

खः जि न्हयलं बिस्युं वयाच्वना

फः फः स्वया: ल्यूवः पिं-

तर गजब इमिके ख्वा: मदु - म्हसीकेत

खालि हाकुसे ग्रहण थें-

जिं न्यना तया थें - इमि पालि लिउने ग्वालि न्ह्यः ने ।

कं कं जक बुया: वयाच्वंगु ल्हाः तुति

इमिगु ख्वा: बुयातः गु दु ।

जि भति शायद थुकियात हे खः भी आजा अजिपिसं

अवतार, अंश धका: मानय् याकातः गु

मिखा तिसिना भागि यानाच्वंगु ।

थथे थः गु पंजाय्

इमिसं भीत म्ये लिकया:, ल्हाः स्वहायेक
छ्यं प्वंका - थः भवय् न्यायेकेधुकल गुलिं
भीत प्वा: छग: थें जक च्वंका ।

जि न्ह्यः या छगु भयंकर सम्भावनाया आशंका
भः न्हुया वयाच्वना
न्ह्याये मदयेवं इमिसं जितः ततः सलं सच्छिकथं सः ता
हयेक वयाच्वन
म्वायेकं छाय् भी सकसियां छपु म्ये दयेवं गा: धका:
म्वायेकं छाय् जिउताः धागः ल्हाः छपां हे दकवं गा: धका:
धृतराष्ट्र्या मायां भीमसेनयात घयपुयेगु ताः कया: थें
जिगु ल्हाः हयेका ज्वनेत आतुर गुलि इपि
जिगु न्हाय् काः वयाच्वन, न्हि काये धका:
बाबु छंत सर्गः क्यने धका:
ख्वाया सौन्दर्य छाय्पिङ्ग धका:

इमि तःधंगु इच्छा

जितः न्हयलय् भुना जिगु छ्यं प्वंका कायेगु
गुगु चिल्लाय् दनाच्वन

थव भीत न्ह्यच्याकेहः गु परिकारय् छु दु धका:

इमिगु मती जिगु म्ये हे स्वपयाना लाका कायेगु

गुकिं जिं म्ये हालाः मचातय् म्हगस बियाच्वना

भीसं ब्वना हयेगु कन्हेया रूप कनाच्वना ।

इमिगु इच्छा - जिगु ल्हाः तुति हे स्वाहायेका कायेगु

गुकिं जिं थव देय्या परिचय च्वयाच्वना

लँ, लुखा जक च्वया: भं भं ततः जायेक दना हयाच्वंगु

प्रत्येक पः खाः थवाना: थवाना: वनाच्वना,

पतिं च्वलाः च्वलाः क्यनाच्वना,

रव लँ, रव लुखा थव पः खालय् धका: ?

शायद - जि न्हयलं बिस्युं वयागु हे

इमिगु छगु दकले तःधंगु हार खः ।

छाय्कि इमिसं स्यू-

मि न्ह्याथाय् हे च्वसां मक्वाकी मखु

न्ह्याथाय् हे च्वसां मग्वाकी मखु

चाहे च्वापुइ हे थला, लखय् हे थदुं तर, थः छचा: ख्वरं मक्वाकुर्से

ला व फुइ हे मखु ।

(नेपालभाषा तपंपौ १०९१)

किंचिक भाय् स्थूरहा मिसा

छगु बखते छथाय् गामे ल्यायम्ह मनू छम्हसिया व्याहा यायेगु गोसा जुया च्वन। जातः हया केन हक्व जितः मयः वा मज्यू धया लित बिया छोत। “जितः किंचिक भाय् स्यूम्ह मिसा जूसा जक व्याहा यायगु मखुसा मेपिं मयः” धका व मिजं संके हे फुगु मखुत। बल्ल बल्ल छथाय् गामे वं धायें हे किंचिक भाय् स्यूम्ह हे मिसा छम्ह चूला वल। छन्ह व मिसायाथाय् जन्ति खलः वना भमचा कया लँय् हया च्वन।

जन्ति खलः तय् लँय् ववं ववं त्यानुया छथाय् भमचा दिका तल। संयोगवस उगु हे बखते अन मगते सीम्ह सिथं हया छथाय् मसान थें जाथाय् वां छोया थकल। छयाधासा मगतय् ला सी उयेगु चलन मदु। अथें त्वता थकीगु। अले भंगपंक्षी जन्तुत वया ला दक्वो चः चः फुना नया थकिगु। उथाय् सिथं हःम्ह सीकियाके लुँ यागु अंगु छपा दुगुलिं को छम्हसिया सीम्ह सिगु ला नये मजिया सुनानं थव लुँयागु अंगु लिकया वनकी अले जि ला नये दै धका हाला च्वंगु व भमचा भाय् थर्ड्कल। अथे जुया व भमचा छगु तोह तया व सीम्हसिके च्वंगु अंगु लिकया विई धका सना च्वन लिकाय् मफया म्हुतुं वाँ वाँ डाना बल्ल लिकाल। थुके भातम्ह तापाकं चेवाकया च्वंगु जुया च्वन। अवश्यनं थव सीम्हसिगु ला नद्म्ह लसी मिसा ज्वी धका मति तया “का, थव मिसा जितः मयः” धका जिद्वी याना च्वन। उखे कलाम्ह लुँ यागु अंगु लिकया कोयात धौवजी तया बिदा बिया वल।

जन्ति खलः तसें व मिसा ज्वना छें हे दुत हसीलिं व मिजं याला तमं मिखां हे छुं मखन।” थव मिसा नापला च्वते हे मखु, वरु जिहे छें प्याहाँ वने” धका सरासर छें प्याहाँ वया लें लिस्से स्वया वना च्वन। ववं ववं व मिजं नं छथाय् लः मदुगु खुसी लोहंचा

जक बा वया च्वन। गजबगु दृष्ट छगु खन। व दृष्ट खना हाकनं न्हन्यज्यां वना च्वच्व छथाय् स्वकु हाकः म्ह माकः छम्हसिनं गुकु हाकः गु सीतार थाना च्वन, कयमिचां कनाथ पुया च्वन, मेपिं भंगः पंक्षी त प्याखं हुया च्वंगु अद्भुत दृष्ट खन।

अन नं पुला न्हज्यज्या वना च्वच्वं



हाकनं छथाय् कुछी हाकगु तुसि ५३ कु हाकगु गुजि लें खना अद्भुत चाया स्वया बंबं ववं तुती हे न्ह्याके मफुत अथे त्यानुया छथाय् पसले तुं फेतुना दिना च्वन। बुढी नं चकना सयेकल “दिसें भाजु, बभां त्वना दिसें।” धका बभां त्वंका भुले याना तल। व मनूनं थमं लँय् खनागु अद्भुतगु दृष्टयागु बयान फुकं व बुढीयात कन। बुढीं व कंगु सकतां डुना च्वन।

अथेसा, आम अद्भुत दृष्ट जितः छको नं क्यना बिई फुला? स्व क्यने मफुत धासा छां न्हासे कौ घाका छन्त च्यः तया तयेगु, ज्यूला” बुढीं डुन।

“ज्यू यंका थथें क्यना बी” व मिजं धाल।

“धाथें व बुढी नापं ब्बना यंका स्वः वले अनला गनं हे छुं मदु, लाचार जुया वैगु ज्वान वसेलि व बुढीचां वैत न्हासे कौ घाका वैथाय हे च्यः याना तया तल।

उखे कलाम्हाला किंचिक भाय् स्यूम्ह जुया निस्ति व ध्यान दृष्टि स्वः वले

थःम्ह मिजंया न्हासे कौ घाका च्यः च्वना च्वन धयागु सिइका काल।

तुरुन्त हे व मिसां थः भातयागु लें फिना सुरुवा न्ह्याना ठीक मिजंयागु रूप कया वहे लें लिना व बुढीया थाय् थ्यंकः वन। मिसा वंबले नं न्हापा भातम्ह खंगु फुकक दृष्ट व मिसां नं खंगु जुया च्वन।

बुढीया पसले थ्यंवले “का, भाजु, दिसें बजां छकोनि साला दिसें” धका बुढीं चकना सयकल। खःथें च्वंक बभां त्वत्वं व मिसा नं थमं लँय् खनागु दृष्ट फुकं बुढीयात बयान यात।

“का, छं आम छको जितः नं क्यनाव्यू। छं धागु बिझु। मफुसा छन्त न्हासे कौ घाका च्यः तया तये, ज्यूला” बुढीं धाल।
“ज्यू अजि, मफु सा च्यः च्वनेगु सकार” मिसां धाल।

धाथें बुढीयात नापं ब्बना यंका व न्हापा खनागु अद्भुत दृष्टत छगुः छगु दत्तले क्यना बिल। बुढीला थव चानचुनम्ह मखु धका मति तया वं धागु विझु सकार यात।

“का थव मिजंयात त्वताव्यू थ्वैगु कौ छगो नं जितः व्यू” धका ज्वन। कबूल यागु थें कौ छगो नं व मिसां यंकल, मिजं म्हानं त्वता बिल। मिसा न्हापांतुं हे छें थंका च्वना च्वन।

मिजम्हसिया आ गन वने बरु छें हे ल्याहां वने धका छें थ्यंकः वंबले कलाम्ह सत्कार याना दुकाल। नके त्वंके याना मिजंम्ह फुक खें कना च्वंबले कौ छगो थमं तीजक न्ह्यने तया बिल। मिजंम्ह ला छकक जुया “धन्य थव मिसा, गुलि सुरबीर व ज्ञां दुम्ह ज्वी” धका प्रशंसा याना उबलेनिसे मिले जुया सुखं आनन्दं च्वना च्वन।

उलिचिया बाखं थुली

नेपायागु पुलांबारं

स्वनिगलय् नागपूजाया संस्कार

आशा कुमार चिकंबर्जार



स्वनिगःया नेवः समाजय सर्प(ताहा) व नागया ताजि विस्कं काथं डाल वयो च्वंगु दः। श्व स्वनिगया उत्पतिया इलय् निसें स्वाडः स्वइगु व लोक संस्कार काथं डाल वयो च्वंगु नागया महिमा बुँज्या अलय् बर्षा (नाः) नपां स्वाडः स्वयंगु या।

थुगु स्वनिगः न्हपा छगः तः हांगु दहः गुयिका नाः नागदहदक धायो वयो च्वंगु दः। थुगु दहया नाः ल्हासाय् नं वम्हा मञ्जुश्री नं च्वभः या डाँडँ तिला म्हूयो नाः पिता छ्वगु किम्बदन्ती काँ कां वयो च्वंगु दः। थुगु थासय् नागपिनि जुजु (राजा) कर्कोटक नाग नं बास याडः च्वंगु धायो तःगु दः। थानाया नाः चाय्कः छ्वसेलिन नाः नपां नागत नं प्याहाँ वाडः अनिकाल जूगु खाँ धाधां वयो च्वंगु दः। अलय थुगु थाय्या पशुपति लिकं मनूया बास च्वंगु बागमती सभ्यताया खाँ नपां गोपाल वंश, महिषपाल वंश, किराती, लिच्छवी, मल्ल, शाहकाल व गणतन्त्र तकया इतिहासया खाँ कुलः च्वंगु दः। उगु फुक्क इलय नं नागया महिमा हालय्गु त्वः मतः। उकीं अनिकाल मजुइकेता तौदहलय कर्कोटक नागता तयहःगु

किम्बदन्ती नं धाधां वयो च्वंगु दः नि। गुगु पुखुया न्ह्याथाय् दाडः स्वसां छकुं खानय् मर्सु अद्भूत थाय् काथं कायो तःगु दः। उम्हा कर्कोटक अष्टनाग मध्येया छम्हा काथं पुराणय् न्हिथाडः तःगु दः। पुराणय् कश्यप ऋषिया जहान कद्रुया सन्तान धायोतः पुं बासुकी, तक्षक, कुलिक, कर्कोटक, पद्म, शुद्धखचुडः, महापद्म व धनञ्जय नां या च्याम्हा नाग काथं न्हि थाडः तःगु दः। (वृहत नेपाली शब्दकोश) अथेहे म्हा जुको मनू व बास्हां च्वय नाग जुयो च्वंपू नागकन्या पाखं मनू दःगुया खाँ पाखं नं नागयाता मां काथं नं कायो तःगु खानय् दः। वहे कर्कोटक सहकालया द्यो करुणामय (लोकेश्वर) कामाक्षां थाना ह्यता तेजाव खुसी ताँ जुयो रवाहाली याबलय हथाय्सं पारी वां बलय् तेजाव खुसी छुपें थियो थुथा जूगुलिं फुक्क नागया छुपें थुथा जुयमः धः गुलिं नागया छुपें थुथाजुगु दक नं धायोवगु दः। अजपुं नाग स्यातकि लाहा माहारोगी जुइगु काथं नागता बचय् याड तयमःगु खाँ दुनय् वैज्ञानिक तथ्य मरुधायमछिं। छुँ स्याडः, किपटद्ग, ब्यां, आदि आहार याइम्हा अलय वातावरण व

पर्यावरणया खाँ पुखाँ धाय मसयो थुकाथं धर्म व पापया लाँपु धायो च्वंगु जुयमः। अलय करुणामय्या रथय् थुकीया आकृति तयो थुगु खाँया रहस्य ब्वलांक तःगुनं जुयफः।

नागराजा:

नागया राजा याय नं राजा द्विष्ठिगः कपः दम्हा द्विष्ठिप्वा म्हुतु दःम्हा शेषनाग दकलय च्वयया नाग काथकायो तः गु दः। क्षिरसागरय् भगवान बिष्णुया शयन कक्ष शेषनागया म्हा धाधां अति च्वय्यायम्हा दक पुराणय् धायो तःगु दः। सुयाय्गु बयान याय मफुगु उपमा वियमःसा द्विष्ठिप्वा म्हुतु दः म्हा शेष नांया धाय् मफः जिं छु धाय् फै धायगु चलन साहित्यखय् छ्यलः तः गुलिं नं शेषनागया महिमा अपलं च्वजःगु खानय् दः। वैज्ञानिक काथं जीव विकासया क्रम स्वयगु खःसा थुगु साउन महिना वा मलमास (पुर्वोत्तम महिना) या इलय् मत्स्य नारायणया महिमा न्हिथानी। थुकाथं दकलय न्हपां जीव विकास नाः खय् च्वनिपुं जलचर प्राणी पाखं जुगु धाय्गु खय् अलय भगवान बिष्णु या उगु शेषनागया म्हाय् शयन याडः बिज्यागु किपा स्वयबलय् शेष नागया च्वय नाखय् डा, शेषनाग उभयचर नाखय् व बायँ नं च्वनय फःम्हा व भगवान विष्णु व लक्ष्मी थलचर काथं क्यदुः तःगु जीव विकासया क्रमया क्रम मखु धाय् मछिं। स्वयगु मिखा व बिचः याय्गु मिखा चाय्क स्वय सः सा पूर्खाया संस्कार संस्कृति दुनयँ अन्धविश्वास व श्वैर कल्पना जक मखु तथ्य नं दःगु खाँ नाराँद्योया तेपुचां बुयो वयो च्वंगु पलसेव व उकिया च्वय बिज्याड च्वम्हा ब्रम्हा नं पृथ्वी सं जीव, बनस्पतिया उत्पतिया किपा नं धायो न्हुँगु पुस्ताता कानय् छिं। अलय साउन

सचिष्ठत हिंडागृगु ख्वप पौ. बःछि पौ(पाद्धिक)

महिनाया श्रावण शुक्ल पञ्चमी खुनुं भव्यं नाग च्वयो तिकः पूजा याडः वयां च्वंगुलिं नं नागया महिमा म्हवैं मजुं धाय् मः। अलय् वा पियता नाः इलय हे व वयक ब्यूगुलिं नागपूजा यागु काथं नं कायो च्वंगु दः। छाय् धःसा नाग पुखुली च्वनिगु, अलय गलसिं पुखु दथवी तयो उकी नाग तैगु भी पुर्खायां कलात्मकता दुनय नं नागता च्वछाय्गु ज्या यागु मधःसिं मगा। अलय् बिकुं तितकीं नागं पुडः हैगु, भुलां स्यंकः पालः ब्यूसा नागं पुडः हैगु, अलय कपायेया पुइं दयकः जाकी सिलः पूजा याकिगु नं मेगु संस्कार दः। धंवं च्वः, सःग वा नाः मुनिथाय् नागः दैगु विश्वास नपां नागया बासस्थान ख्यः, पुखु आदि ल्यंक तय मःगु खाँ दुनय नं जीव विज्ञानया अस्तित्वया खाँ दः। अलय नागः मनूया भिं म्हूइम्हा, सुरक्षा याइम्हा काथं मचातयता कण्ठुलीचा ख्य् न्याया नागपासचा तकः सुरक्षा ज्गूभः पिइगु ज्या ख्य् नं म्हाय् न्याया क्वचा तय्के मःगु खाँ नं दः। अथेहे बःचा धितकीं ‘नागया पुखुली धवंपुं धवंपुं धाधां मचात दुमः (नाग) जुयो पुखुली च्वः च्वंम्हा सिनं बिसे जुयो म्हेतिगुकासा अः मचातय्सं मम्हेतय धुंकल। बुलुहुं संस्कार संस्कृति सालुयो वांसेलिं भीगु मचा कासा नं मदयो वांगु खाँ धायो च्वनय मालिये मच्वं। अलय नाग नपांया विश्वास म्हवैं जुयो वांसेलिं बारे (पलेस्वं) पुखु, भुलां, ख्यः त्यलः थःगु याडः हःगु नं अपलं बुखाँ न्यनय् दः।

नाग नपां नागमणिया खाँ नं हनय तय है। अलय वहे मणी दः म्हा नागया महिमा कौं कां नागमणि कः वाडागु इलय्या तस्कं हायेपुगु खाँत अजा अजि पाखं न्यडा। नागमणि दः म्हा मनू अथे अथे तःमि जुइगु खाँ नं समाजय विश्वास याडः च्वंगु खाँ खः। भीमसेनता कौरवपिसं विष नकः समुन्द्रय क्वफ्वाडः छ्वबलय नागं भीमसेनता डाडः बिष समन यागु अलय भन बल्लाक युद्धकला स्यडः हःगु खाँ नं महाभारतय् न्यनय

दः। उकीं नाग, भिंम्हा पात्रकाथं पिब्वयो तःगु दः। बुद्ध लुम्बिनी बिज्या बलय ‘वरुण नामया नाग राजानं जल धारा हायकः बिज्याकः शेष नागया म्हसं बिज्याकः धायो पवित्र, ज्याख्य नं नागराज पिसं ग्राहाली यागु खाँ पूर्वज पिसं धायो तःगु दः। उकीं नाः नपां स्वपु दःपु नागराज काथं थईकीं अलय गरुडं नागलिङ्गु (ना:लिङ्गु) विश्वास काथं मिजंम्हा नागः जक लिडः स्याय दःगु खाँ नं अपलं किम्बदन्ती थाय् थासय्या भुलां, ख्यः, पुखु, दहः दुनय्या स्वापुतयो काडः च्वंगु दः। चाँगुं क्वयया पुखु, दह क्वयया दहया नागः लिडः यंकसेलिं आनाया पुखु ज्वः दायो वाडः दह हे मदयो वांगु भी बाज्यापिसं काड तकगु न्यडा। अथेहे काल्हाँचा च्वयया तःपु गरिया सत्यनाग यलाय् मनूया रूप कायो जाहवला ख्यलय नं क्यंगु स्वः वाडः च्वंगु इलय चांगुया गरुडं नाः लियता व बलय आना सत्यनाग मरुगुलि लिथु हथु मिसातय्के न्यना। अमिसं गरुडता थईके मफयो तुइगु नं फियो, कपः छागः दकलय् तः हिडः स्वयो च्वंम्हा, छुपें छुपु सुचुकय मफयो नाः तिकितकी वयक च्वंम्हा हे सत्यनाग धायो वयागु हुलिया कांसेलिं गरुडं आना हे वाडः उम्हा नागता लिडः ज्वन। अजु चायो नागं आना थ्यकः वयो थःता म्हासिइकः ज्वनय फः गुया हुनि थः हे नेम्हा मिसापुं धाय्गु गरुडपाखं न्यडालिं थःता छन्हया लागिं त्वःतः बिया कन्हे वय धायो सत्य वाचा याडः गर्दपाख्य बिदा कायो छैं वयो थः मिसापित्ता न्वाडः थः चांगुया गरुड थाय वांगुलिं आनाया गरुड अजुचायो सत्यवाचा दः म्हा नाग धायो मनःसिं क्वाखायो तः गुलिं अतकनं आना दःनि धाय्गु जन विश्वास दः अलय् हथुम्हा तपु गरिखंय च्वः निहुरां खुला ख्यय्गु अलय् लिथुम्हा सुन्दरी जलय् वाडः चांगुया दोलागिरी पर्वत हे चुइकेगु मति तयो वांसां अथे याय् मफयो बर्षा खुल्ला ख्वइगु विश्वास अः तक नं बुढा-पाका पिसं

याडः च्वंगु दः नि। अलय् नागपञ्चमी खुनुं चाँगु वानिगु चलन अः तक नं दः नि।

गुब्ले असार वःवैगु लिपा लासा बासी (नागः) मुल नाखं छ्वाक आनानिसें हर हर महाद्यो, पानी दे, अलिकति पुगेन धेरै दे जक हाहां थःथःगु लागया बासी पुजायो वानिगु चलन अःनं दः नि। भौल्वाँच्या पुखुली नागया कपः, महाकालीया अलांचोय द्रकाया व्यवयं म्हाँ अलय् चाँगुइ छुपें दःगु काथं थुगु थाय् नागया, म्हाय् देनय दःगु मति तयो तःगु दः। उकीं गनां नागया लाँ, गनां नागया पुखु (थालाछ्यै) गनां नागया थःछैं अनेक काथं थुगु नागः दहया पुलांगु खाँ याता प्रमाणित याय्गु काथंया किम्बदन्तिं जायक च्वंगु दः। अलय् साँक्व पुन्ही हाँ धर बासी थः छैं वानिखुनुं व वइगु अलय् ल्याहाँ व खुनुं नं व वइगु विश्वास काथं संजोग हे जूसा पाय्छी जुयो च्वंगु दः। गुकीं किम्बदन्ती नं सत्य काथं डालः वयो च्वंगु दः। अथेहे दक्षिण पाखय्या ख्वपय्या जनतात नाः फ्वनय्यता चुपिंगालय् बासी मुलः धल्चो बासी इनरय् गुई वाडः पुजायो वानिगु चलन दः।

संस्कार व संस्कृति दुनयया सत्यता मामां वानय्गु छुं नं किम्बदन्तीया लिधंसाय् इतिहासया पला ख्वायै लयो वै। हलिंपतः विजयध्वजा नपां म्वाडः च्वंगु नागनागिनया बाखं, सिद्धपुखुली दुडः नागनागिन जुयो नाः जायकगु न्यैं कं बाखं दुनय् गथे छगु शताब्दी लुकुं बिडः च्वंगु खः खोहेया ल्वहँया नागया प्रतीक्षाये पिपिं मवइगु याडः मखुसें हिलः माल स्वयो धातयेगु खाँ नपां वैज्ञानिक तथ्य नं कानय् फःसा संस्कार संस्कृति ज्गां जुगः म्वाडः च्वनि। मखुसा बुई वलाचा व्यः वांम्हा मिसामचां परासी चिखीख्य चिडः तपुयो बच्य याम्हा नाग व वं ब्यूगु वरदानं जुजुपा छैं लाम्हा मिसा मचाया बाखं थे छगु हायेपुक्यगु न्यैं कं बाखंये जक जुई। न्हैंगुं पुस्ता लोक साहित्य व संस्कृति दुनयया धातयेगु खाँ लुइकेता पला छियमः।

ख्वप नगरपालिकाया ज्या भ्रवः त

राष्ट्रिय योजना आयोगया डा. फुयाल ख्वपय्

साउन १४ जाते

ख्वप नगरपालिकाया प्रमुख सुनिल प्रजापति नपां राष्ट्रिय योजना आयोगया डा. राम कुमार फुयाल नपां दक्षिण कोरियाया चोन्नाम राष्ट्रिय विश्व विद्यालयया प्रोफेसरया पुचः आइतवार नपालाडु ख्वप नगरपालिका पाखां चाय्कः तःगु कलेजतय्गु शैक्षिक विशेषता, विश्व विद्यालय चाय्केगु खाँय छलफल याडः दिल । उगु पुचलय् दक्षिण कोरियाया चोन्नाम राष्ट्रिय विश्वविद्यालयया प्रो. सोड हो लि, प्रो. जु मोड ना, पी एचडी स्कलर डुटी किम, प्रो चुलहि पार्क पु भःगु जुल ।

उगु पुचलं ख्वप नगरपालिकापाखां चाय्क तःगु ख्वप कलेज, ख्वप अस्पताल, ख्वप इन्जिनियरिङ कलेज व ख्वप कलेज अफ इन्जिनियरिङ भायो स्वयोदिल ।



छुँ छुँ नर्सिङ व ब्वनय् कुथिया नर्स पिन्ता बांलाक हछ्याय्गु

साउन १५ जाते

ख्वप नगरपालिकाया प्रमुख सुनिल प्रजापतिया नायो सुई छुँ छुँ नर्सिङ व ब्वनय् कुथिया नर्सिङ्या असार महिनाया लच्छीया छकः च्वनिगु बैठक सोमबार च्वासे वयकलं जनताया छुँ छुँ वाडः अः पुक व कार्यालिक जनताता स्वास्थ्य सेवा वियगु मतिं ख्वप नगरपालिकां छुँ छुँ नर्सिङ सेवा न्ह्याक विशेषकाथं मचात, मचाबुपुं मिसात थाकालिपुं जेछ नागरिक व दीर्घरोगीपिन्ता स्वास्थ्य सेवा वियगु मतिं न्ह्याकगु थुगु ज्या इवः नपां ब्वनय्कुथिया नर्स सेवा नं अभ बांलाक

यंकय्गु तातुना काडः दिल ।

छुँ छुँ वानिपुं नर्सपिसं जनप्रतिनिधि व जनताया दथवी समन्वयकर्ता (स्वापु तैपुं) काथं ज्या सानय् मःगु नपां इलय् -ब्यलय् थी थी ल्वयया बारे जनता ग्वाकय्गु ज्या इवः त त मिजासं खाँ ल्हाडः बांलागु ब्यवहार याडः विरामीपिनिगु सेवा याय्ता लाँपु क्यडः दिल ।

वयकलं न्हाँगु आर्थिक वर्षय् ख्वप अस्पतालं न्हुँ न्हाँगु योजनात हछ्याय्गु खाँ ब्याकसे जनता धात्थे स्वास्थ्य सेवा काय्गु मति वांकय् फय्कः सेवा वियमःगुलि बः याडः दिल ।



ज्या इवःसं हिगुं तुं बडाया वडा नर्सपिसं बडावासी पिनिगु स्वास्थ्य अवस्था या ल्या पिब्बयो दिसे छुँ छुँ नर्सिङ सेवापाखां थः पिसं वडा वडाय् चिनी ल्वयया अभिमुखीकरण ज्या इवः तः तं ब्वनय् कुथि पोषणया कक्षात न्ह्याकः महिनावारीया खाँ, नपां प्वाथय्दःपुं, मचाबुपुं मिसातय्ता छुँ छुँ वाडः मः कार्यया सेवा वियो च्वडागु खाँ ब्याकः दिल । उगु इवलय् ब्वनय्कुथिया नर्सपिसं थः ज्यासाडः च्वडागु ब्वनय्कुथिया स्वास्थ्य परीक्षण व ब्वनामिपिनिगु स्वास्थ्य अवस्थाया खाँ काडः दिल ।

सचिव हिंडागृगु ख्वप पौ. बःछि पौ(पाद्धिक)

साउन १६ जाते

देश व जनताया निःस्वार्थ सेवा याय् मः

नेपाल मजदुर किसान पाटीया हानयवहम्हा नायो भाजु नारायण मान बिजुक्छु (रोहित) जुया मू पाहाँलय् ख्वप माध्यमिक विद्यालय पलिस्थायागु नीडादा (वह वुदि) या लसताय नपां शारदा क्याम्पस व मा.वि. सं हिंछू तगिलय् भर्ना जू वपु न्हूँ पु ब्वनामिपिन्ता लसकुस नपां लाँपु क्यनय् ज्या इवः जुल ।



ज्या इवः या उलेज्या यासे मू पाहाँ बिजुक्छु जु कलेज्य ब्वं वपु थी थी जिल्लाया ब्वनामिपिसं ब्वनय् नपां नपां राष्ट्रिय व अन्तर्राष्ट्रिय राजनीतियाय् नं खाँ थुइकः देश व समाजया निः स्वार्थ सेवायागु भावनां हज्यायमः धायो दिल ।

दे हज्याय् गुलि राजनीतिया तः हाङु लाहा दैगुलिं निः स्वार्थ जुयो सांगु राजनीतिं जक देशया आर्थिक दुथा बल्लाडः हज्याय फैगुलिं विद्यार्थी जीवनय् निसे ब्वनामिपिन्ता भिंगु राजनीति याय् ता घ्वासा व्यू व्यू वानय् मःगु खाँ ब्याकसे वयकलं देश विदेशया भूगोल ब्वंसा ब्वनामिपिन्ता विचः तव्याडः वानिगुलि किताबी ज्ञानजक खय् लिकुडः मच्वसें थी थी अध्ययन अनुसन्धान जक न्हूँ न्हूँ खाँ लुईकेनु थुइकेगुलि ब्वनामिपिसं मति तयो जुयमः धायो दिल ।

देश भक्तिया भावनां गवापु ब्वनामिपिसं थःगु देया उन्नति प्रगति याय् ता न्ह्याब्लें हदाय च्वडः ज्या सानिगु खाँ ब्याकसे वयकलं विदेशं सय्क वयागु ज्ञान थःगु देशय् नं छ्यलय् फःसा वनं छ्ग् तःलागु ज्या काथं कायमः धायो दिल ।

नेपाल मजदुर किसान पाटीया छ्याज्जे नपां संघीय सांसद प्रेम सुवालं सरकारं ख्वप विश्वविद्यालयया विधेयक पारित याक्यूता लिपालाक च्वनय् मज्यूगु खाँ ब्याकसे ख्वप विश्वविद्यालय न्ह्याकः ब्वनामिपिन्ता न्हूँ न्हूँ विषय ब्वंकः अनुसन्धान याक्यूगु तातुना दःगु खाँ काडः दिल । शिक्षाया लागाय् याडः च्वंगु भागावण्डायाडः दे लथालिङ् जुयोच्वंगु खाँ ब्याकसे वयकलं सरकारं ल्यासे ल्याम्होपिन्ता विदेशी भूमिसं दांपु ज्यामि याय् यंकगुया विरोध फुककसिनं यायमः धायोदिल ।

ख्वप मा.वि. या जगं थाहाँ वयो ख्वप नगरपालिका न्हूँ न्हूँ शैक्षिकसंस्थात पलिस्थायासे दांकः भिंक बालाकः शिक्षा व्यू व्यू वयो च्वंगु नपां २१ गू शदिया लागि योग्य, देशभक्त नागरिक ब्वलांकयगुलि थुगु संस्थाया तहाङु लाहा दःगु खाँ सांसद सुवालं धायोदिल ।

ललिता निवास जग्गा प्रकरण, नक्कली भुटानी शरणार्थी प्रकरण व लुँ काण्ड प्रकरण थजगुलि सरकारनं दुथ्यागु राजनैतिक नैतिकता हे मरुगु या दसु खः धायो दिल ।

ख्वप नगरपालिकाया प्रमुख नपां विद्यालय सञ्चालक समितिया नायो भाजु सुनिल प्रजापतिं ख्वप नगरपालिकां शिक्षा लागाय् छ्यः गु लाय् ख्व देश व समाजं उपलब्धी कायो च्वंगु खाँ ब्याकसे देशां देछिख्यू जनस्तरं कलेजत चाय्कसा, शैक्षिक संस्था चाय्कसा गरिब जनताया काय म्हयाय् पु थिक्यू थिक्यू गु कलेजय् ब्वनय् म्वालीगु खाँ ब्याक दिल ।

ख्वप विश्व विद्यालय चाय्केता ख्वप नगरपालिकां हदाय तयो हज्याडः च्वंगु खाँ कुल दिसे वयकलं ब्वनय् इवलय दायै दायै लाखौ ब्वनामिपु विदेशय् वांसेलि नेपः या कलेजत मचात मदयो संकटय् लाडः च्वंगु खाँ ब्याक दिल ।

ख्वप नगरपालिकाया उप-प्रमुख नपां विद्यालय सञ्चालक समितिया न्वकु रजनी जोशी ख्वप नगरपालिकां चाय्कः तःगु च्यागू कलेजं ख्वप दे याय् जक मखुसें देछांदेछिया ब्वनामिपिन्ता ब्वंकः देश हज्याय्ता ग्राहाली याडः च्वंगु खाँ ब्याकसे ख्वप नगरपालिकां हदाय तयो ज्या साडः च्वंगु ख्वप विश्व विद्यालय संसदं मथां हे पारित जुझगु विश्वास प्वंकः दिल ।

नेपाली खुला विश्वविद्यालय व्यवस्थापन व कानून संकायया डिन प्रा.डा. अरहन स्थापित जु नेपालय २०१७ सालनिसे खुल्ला विश्व विद्यालय निःस्वांगु, उगु विश्व विद्यालय प्राविधिक विषयया अध्ययन अध्यायपनय् बः याडः वयो च्वंगु विशेषता काडः दिसे दक्ष जनशक्ति देया अर्थपूर्ण सम्पति खः धायोदिल ।

ख्वप अस्पतालया मेडिकल डाइरेक्टर डा. मजेश प्रताप मल्लं ख्वप सर्कलया गौरवपूर्ण इतिहासता अभ च्वजाय्केता ब्वनामिपिसं अजः अपः मेहनत याय मःगु खाँ ब्याकसे ब्वनामिपु न्ह्याब्लें न्हूँ न्हूँ खाँ सिइकेता तः लाक जुयमः धायो दिल ।

ख्वप इञ्जिनियरिङ् कलेजया प्राचार्य ई. सुजन माकं ख्वप नगरपालिकां 'छखा छ्यू छ्म्हा स्नातक' दयकेनु तातुडः निःस्वांगु कलेजया तातुना बुलुहूँ पू वांडु च्वंगु खाँ ब्याकसे थुगु कलेजं अध्ययन अनुसन्धानता भिंक यंक्यूगु ई काथं मःगु विषयत ताँ तां, राष्ट्रिय व अन्तर्राष्ट्रिय सम्मेलनता बः व्यू व्यू वगु खाँ काडः दिल ।

उगु ज्या इवः सं ख्वप कलेजया प्राचार्य प्रकाश कुमार श्रेष्ठ व ख्वप मा.वि. या प्राचार्य लक्ष्मी प्रसाद कर्माचार्य जु पिसं हिंछू तगिन्तय् हिंगुस्म्हा स्वयो अपः ब्वनामिपु भर्ना जूवगु ल्या पिब्वसे ब्वनामिपिन्ता हिलमाल स्वयगु खोजमूलक स्वअध्ययनय् दुतिडः सामाजिक सञ्जालया विवेकपूर्ण काथं छ्यलय्ता लाँपु क्यडः दिल । ज्या इवः या दथ्वी दथ्वी ब्वनामिपिसं सांस्कृति ज्या इवः नं पिब्वगु खः ।

सचिवत हिंडागृह ख्वप पौ. बःछि पौ(पाद्धिक)

किसानत मुंकल:

साउन १६ जाते

ख्वप नगरपालिकाया रवसालय नगर दुनय्या किसान त मुंक वाबइँ जुइगु रोग व ल्वय् जुकिपुं कीचात गथे न्हांकय्गु धाय्गु खाँ नपां समसामयिक विषयसं मंगलबार कृषक पुं मुंकल ।

उगु मुंज्या सं ख्वप नगरपालिकाया प्रमुख सुनिल प्रजापति जुं वा बुइँ थिइगु रोग व ल्वय याइपुं कीचात न्हांकय्गु खाय॑ वडा-वडाय् हे प्रशिक्षण बियो किसानतय्ता खाँ थुइकः ज्या स्पनय्गु काथं सैद्धान्तिक व व्यवहारिक ज्ञान बियगु नगरपालिकाय्गु तातुना खः धायो दिल ।

नेपाल कृषि अनुसन्धान परिषदं (नार्क) किसानतय्ता भिं जुइगु छुं हे ज्या याय् मफूगु खाँ कुल दिसे वयकल नार्कया कृषि वैज्ञानिक पिन्ता न्हूँ न्हूँ अनुसन्धानय् छ्यलय् मःगु अलय् कृषि प्राविधिकपुं ब्वलांकय्गुलि सरकार बिचः याय् मःगु खाँ नं काडः दिल ।

ख्वप नगरपालिकां चा जाँचय याय्गु प्रयोगशाला दयकेता बः बियागु खाँ कुलदिसे वयकल नेपः देता थःगु तुतिखय् दानय् फय्के बियता कृषि अर्थतन्त्र ब्ल्लाकय् मःगु थैया आवश्यकता खः धायो दिल ।

प्रमुख प्रजापति जुं गण्डक सम्भौतां याडः तराई (मर्से) या किसानतय् इलय् हे वापिय मखांगु खाँ कुलदिसे गुर्की भीगु देशय् जानय्ता जाकीया समस्या जुइगु गुर्की भी कत देया भरय् म्वाय्

सहकारी अनुगमन

साउन १६ जाते



ख्वप नगरपालिकाय् निःस्वाडः तःगु सहकारी अनुगमन समितिया रवसालय कमलविनायक, च्याम्हासिंह, भुलांचा, बारहीस्थान व घलाँते च्वंगु बहुउद्देश्यीय सहकारीया अनुगमन यात ।

ख्वप नगरपालिकां स्थानीय तह्या सहमति मदयकः बागमती प्रदेश दर्ता याडः न्ह्याकः तःगु सहकारी संस्थातय्ता ख्वप नगरपालिका दुनय॑ चाय्के मबियगु खाँ बः छिसेलिं अनुगमन यागु खाँ सहकारी अनुगमन समितिया कजि हरिप्रसाद बासुकलां काडः दिल ।

उगु अनुगमनय् समितिया दुजः पुं हरिरत्न गोर्खाली, श्याम सुन्दर मातां, सिद्धिराम अवाल, कृष्ण गोपाल चौसुठी, तारादेवी शाक्य पुं भःगु खः ।

मालिगु ई वयफःगुलि सचेत जुयमः धायो दिल ।

ख्वप नगरपालिका वडा नं ३ या वडाध्यक्ष राजकृष्ण गोरां किसानतय्ता वाबइँ जुइगु रोगाया खाँ काडः सचेत यायां ल्वय



मजुइकेता याय् ज्यूगु उपाय इलय् हे कानय् फःसा बुं अपः अन्त सय्के फैगुलि नगरपालिकां थजगु ज्याइवः तहांगु खाँ काडः दिल ।

नेकाकिसंघया न्वकु भाजु गोविन्द दुवाल नेपः देशय् कृषि प्राविधिकपुं ब्वलांकय् मःगु खाय॑ बः बियो दिसे वाबइँ जुइगु ल्वययाय् खाय॑ किसानतय्ता इलय् हे सचेत याय् फःसा लिपा नोक्सानी मजुइगु खाँ ब्याक दिल ।

जापानी भाय् स्पनय्ज्या

साउन १५ जाते



ख्वप नगरपालिकापाखं चाय्कगु स्वलाया जापानी भाषा तालिम थौं निसे न्ह्यातः । ख्वप नगरपालिकाया प्रमुख सुनिल प्रजापति जुं उलेज्या याडः दिसे प्रशिक्षकपिन्ता तालिम सामग्री लः ल्हाडः दिल ।

सचिव हिंडागृह ख्वप पौ. बःछि पौ(पाद्धिक)

डेंगुया सचेतनामूलक च्याली

साउन १६ गते

अः डाढः पुङः वयो च्वंगु डेड्गु ल्वचं मपुंकय्ता रवाकय्गु मतिं ख्वप नगरपालिका वडा नं. ४ या रवसालय् वडाया चुकः, बजार, गल्ली, सडक व न्हूँग बस्तीस मंगलवार जनचेतनामूलक च्याली यागु जुल। उगु च्याली तालाक्वं न्ह्याकः घखाः, बुल्वा, स्वंमला, गःहिति, लैको, खलौं, जाँलाचा, राममन्दिर, भुलांचा, अरनिको राजमार्ग, गःपलि, राममन्दिर, तँचा, ताहामला, थुचो, दुगुमला, नासमता जुयो हक्कनं तालाक्वयसं थ्यंकः क्वचाय्गु खः। उगु च्याली सं डेंगुयाय् जानकारीमूलक पर्चा इडः ब्यूगु खः।

ज्या इवः सं वडा नं. ४ या वडाध्यक्ष उपेन्द्र सुवालं डेंगु ल्वय खानय् दःगुलिं उगु ल्वचं मथिङ्क मपुंकः च्वनय्ता वडाबासीपिसं सुचुकुचुख्य् ध्यान तयमःगु, छैया चाकलीं नाः ममुंकः गः ल्हाय् मःगु खाँ ब्याकः दिल। ज्या इवः सं वडाया दुजः बिष्णु केशरी



दुवालं च्याली सं भःपुं सकलसिता सुभाय देछायो दिलसा वडा नर्स रसिला सुवालं ज्या इवःया तातुना काडः दिलसा च्याली सं जनप्रतिनिधिपुं शिक्षक विद्यार्थी, कर्मचारी, कासामि, स्वास्थ्य स्वयम सेविकापुं व स्थानीय जनतातयसं ब्वति कायो द्यूगु खः।

डेंगुया अभिमुखीकरण



डेंगू या सचेतना

ख्वप नगरपालिका वडा नं ३ या रवसालय जुगु, डेंगु ल्वचं मपुंकः च्वनय्ता यायमः गु ज्या या सचेतना ज्या इवः सं ख्वप नगर प्रमुख सुनिल प्रजापति जुं अभिमुखीकरण याडः दिल।



छलफल ज्या इवः

अथेहे ख्वप नगरपालिका वडा नं २ स्वास्थ्य उपसमितिया रवसालय 'विश्व स्तनपान सप्ताह २०८०' या ज्या इवः साउन २१ गते आइतबार जुल। मचातय्ता मांया दुरु त्वंकय्गु विषय स्थानीय महिला पिन्ता जानकारी ब्यूगु जुल।



सचिवत हिंडागृगु ख्वप पौ. बःछि पौ(पाद्धिक)

मन्थली नगरपालिकाया प्रमुख ख्वप नगरपालिकाय्

साउन १० गते



ख्वप नगरपालिकाया प्रमुख सुनिल प्रजापति जुं रामेछाप मन्थली नगरपालिकाया प्रमुख लव श्रेष्ठ नपांया जनप्रतिनिधिपिनिगु पुचः ता तकातपुली पुइकः खादा क्वखाय्कः लसकुस याडः, दिल । सांस्कृतिक नगरय् लसकुस यासे वयकलं ख्वप नगरपालिकां त्रिभुवन विश्व विद्यालय व पूर्वोञ्चल विश्व विद्यालयया सम्बन्धत कायो अःच्याग् शैक्षिक संस्था चाय्कः, देशां देशिया न्यद्वस्वयो अपः ब्वनामिपुं उच्च शिक्षा ब्वडः च्वंगु खाँ काडः दिल ।

ब्वनामिपुं च्वयया शिक्षा ब्वनय्ता धेबा मता धाय म्वायकः शैक्षिक ऋण व छात्रवृत्तिया व्यवस्थायायां ख्वप नगरपालिकां अःपुक बियो च्वंगु खाँ ब्याकसे वयकलं ख्वप नगरपालिका थःगु हे तुतिखय् दानयगु कुतः यायां वयो च्वंगु खाँ ब्याकः दिल । ख्वप नगरपालिकाय् स्वयो सामुदायिक ब्वनयकुथि, स्वास्थ्य, विकास निर्माण थजगु लागाय् च्वजाय्कः हछ्याडः यंक्यता थीथी स्थानीय तहया जनप्रतिनिधिपुं ख्वप नगरपालिकाय् भ्रमण भायो च्वंगु खाँ कुल दिसे देशां देशिया जनस्तरं ब्वनयकुथि/कलेज चाय्कगु जूसा

गरिबपिति सन्तानता भिंजुइगु खाँ काडः दिल ।

मन्थली नगरपालिकाया प्रमुख लव श्रेष्ठ मन्थली नगरपालिकासं थी जात, जाति, भाषा-भाषी व संस्कृति, संस्कार दःपुं नागरिकपुं च्वडः च्वंगु खाँ काडः दिसे शिक्षा व स्वास्थ्यता हदाय् तयो ज्या साडः वयो च्वडागु खाँ ब्याकः दिल ।

वयकलं कृषि लागाय् अपलं च्वन्ह्याकय् फैगु नगरपालिका खयानं बजारीकरणया समस्यानपां ल्यासे ल्याम्होपुं सहरकेन्द्रित मानसिकतां जायो प्याहाँ वाडः च्वंगु खाँ काडः दिसे कृषि व भेटेरिनरी विषयया ब्वनयगु ब्वंकयगुया लागिं प्राविधिक शिक्षात चाय्क च्वडागु खाँ ब्याक दिल ।

नपालायगु इवलय् ख्वप नगरपालिकाया उप प्रमुख रजनी जोशी, प्रमुख प्रशासकीय अधिकृत विजय कुमार शर्मा, मन्थली नगरपालिका वडा नं ५ या वडाध्यक्ष रविन कार्मी, निवर्तमान वडाध्यक्ष रजेन्द्र चौहान व सामाजिक अभियन्ता विपिन भट्टराई पुं भःगु जुल ।

सामुदायिक विकास कोष लः ल्हात

साउन १० गते

ख्वप नगरपालिका वडा नं ५ या चण्डेश्वरी बचत व ऋण सहकारी संस्थां सामुदायिक विकास कोषया बच्छी धेबा २३,७६५ व ख्वप नगरपालिका वडा नं १० देकोचाय् च्वंगु भुवनेश्वरी कृषि सहकारी संस्थां ७००५/- तका दाँ ख्वप नगरपालिकाया प्रमुख सुनिल प्रजापति जू याता लः ल्हाडः दिल ।

अथेहे ख्वप नगरपालिका वडा नं ४ बोलाछ्यां सप्ततारा बचतं १४३८/- तका दाँ व ख्वप नगरपालिका वडा नं ९ चोफलय्या गुरुगणेश बचतं ५२,३५७/- तका दाँ विकास कोषया बच्छी धेबा काथं नगर प्रमुख सुनिल प्रजापति जू याता लः ल्हाडः ब्यूगु खः ।



अथेहे साउन २४ गते ख्वप नगरपालिका वडा नं २ या इन्द्रायणी बचतं सामुदायिक विकास कोषय मुडः तःगु बच्छी धेबा ८९,८८/- तका दाँ ख्वप नगरपालिकाया प्रमुख सुनिल प्रजापति जू याता लः ल्हाडः दिल ।

सचिव हिंडागृह ख्वप पौ. बःछि पौ(पाक्षिक)

सामाजिक सुरक्षा भत्ता नवीकरण लगत कट्टाया छलफल

साउन १८ जाते

ख्वप नगरपालिकाया गवसालय् ख्वप नगरपालिकाया फुक्क वडाया कार्यालय सचिवपुं व सामाजिक सुरक्षा भत्ता इडः विइपुं फुक्क स्वापु दःपुं बैंकया प्रतिनिधिपुं च्वडः सामाजिक सुरक्षा भत्ता नवीकरण व लगतकट्टा थी थी विषयसं बुद्धिवार छलफल जुल ।



स्वः भाल



साउन १९

ख्वप नगरपालिका वडा नं. २ कालिघाट (कासनय्) च्वंगु कालिघाट ब्वनय् कुथिसं ख्वप नगरपालिकाया प्रमुख सुनिल प्रजापति जु स्वः भायो मः काथंया सल्लाह बियो दिल ।

साफू चिखी फ्यनय् ज्या



सुदर्शन राज तिवारी जूं च्वयो द्युगु 'भक्तपुर' नां या साफूया चिखी फ्यनय् ज्या नपां आर्किटेक बुक्सपया हिक्गू बार्षिकोत्सव ज्या इवः या उलेज्या ख्वप नगरपालिकाया उपप्रमुख रजनी जोशी नं याडः दिल ।

सम्पदा म्वाकः तयमः

बवचाल ।

ज्या इवः सं नेपाल मजदुर किसान पाटीया छ्याङ्जे नपां संघीय सांसद प्रेम सुवालं मानव सभ्यताया ताकी ग गं हज्याडः व बलय् संस्कृति व सम्पदानं विकास जूगु खाँ काडः दिल ।

बयकलं बेलायती यात्री ईए पावेलं 'ख्वपया सम्पदा स्वय मखांसां बच्छी संसारया सम्पदा स्वय मखांगुति ग्यनि' धायोदिलसा थुकीं भी पुर्खाता च्वछायो गौरव यातसा नपां भीता सम्पदा ल्यंकः म्वाकः तयो न्हूँगु पुस्ताता लः ल्हाडः तक्यगु जिम्मेवारी नं बिल ।

युनेस्को ख्वपया सस्कृति, सम्पदा ल्यंकः म्वाकः तयगु नपां सुचुकुचुया ल्य ज्या याडः ख्वप देता सिरपा नं ब्यूगु खः अलय मेगु सहरता ल्यज्या याय्ता ख्वप देता जिम्मा नं ब्यूगु खाँ कुल दिसे बयकलं प्राकृतिक व सांकृतिक नेगूं तुं सम्पदा ल्यंकः म्वाकः तयमः गु खाँ व्याकसे थव न्हूँ पुखु (रानीपुखु) भीगु सम्पदा खः । अलय स्वनिगलय् गुलि नं सांस्कृतिक सम्पदात न्हाडः वानय् धुकल, त्यल काय धुकल । खुसीया बः मेदखय् हिइकः छैं दाडः तःगु दः । यैं या ठमेलमा पलेस्वां पुखु (कमल पोखरी) सार्वजनिक थाय् निजीयाडः

साउन २० जाते



ख्वप नगरपालिकाया गवसालय जूगु 'सांस्कृतिक सम्पदा पद यात्रा' ज्या इवः शनिबार यासे ख्वपया सम्पदात सिइके बियगु नपां सम्पदा ल्यंकः म्वाकः तयगु मति ग्वाकय्ता उगु ज्या इवः ख्वप नगरपालिका वडा नं १ या न्हूँ पुखु (रानी पुखु) लिई थ्यंकः

छायाँदेवी कम्प्लेक्स व्यापारी भवन दय्के धुंकल। गुगु व्यापारीक भवन सरकारय् वांम्हा सांसदं उलेज्या यागु खः। उकीं सम्पदा त्यलः कायगु व न्हांकः नयगु ज्यानं छगू काथंया भ्रष्टाचार हे खः।

ख्वप विश्व विद्यालय पारित मयागु खाय॑ सांसद सुवालं धायो दिल - 'ख्वप विश्वविद्यालयया विधेयक पारित मयाकपुं सरकारक्य् राणा शासनया पहः ल्यं दःनि।'

ज्या इवः या सभापति नपां ख्वप नगरपालिका प्रमुख सुनिल प्रजापति जुं 'पुर्खा दयकगु सम्पति भीगु कला व संस्कृति' या नारा अजनं म्वाकः ज्यव्यकः तयगु कुतः काथं ख्वप नगरपालिकां थानाया सांस्कृतिक सम्पदा ल्यंकः म्वाकः तयगु, बालाक, बल्लाकः तयगु अलय् न्हूंगु पुस्ताता लः ल्हा ल्हां यंक्यगु, नीति काथं हज्याडः च्वडागु खाँ व्याक दिल।

ज्या इवः धिसिलाक क्वचाय्केता ग्वाहाली याड दयूं सकलसिता सुभाय् देशायोदिसे वयकलं 'भक्तपुर महोत्सव' ता तथारी काथं नं सम्पदा पदयात्रा ज्या इवः हछ्याडागु खाँ काडः दिल।

'पुर्खा दय्क तकगु सम्पति' ता गथे खः अथे हे न्हूंगु पुस्ताता लः ल्हायगु तातुडः नगरपालिकां ज्या साडः च्वंगु खाँ वयकलं काडः दिल।

नगरपालिकाया उपप्रमुख रजनी जोशीं नगरपालिका दुनयया पुखुया खाँ व छाय् दय्केमाला धायगु खाँ काडः दिसे पुखु ऐतिहासिक व धार्मिक काथं नं महत्व दैगु खाँ काडः दिल।

वयकलं पुलांगु सम्पदाता न्हूँ काथं छ्यलयगु ख्वप नगरपालिकाया मतिया खाँ व्याकसे पुखुया चाकलीया लक्स सफा, स्वच्छ याय्ता ग्वाहाली याइगु खाँ काडः दिल।

खँचा पुखुली सुचुकुचु

साउन २० ज्ञते

ख्वप नगरपालिका वडा नं. ७ य् इनाचो खँचाय् च्वंगु ऐतिहासिक महत्वया खँचा पुखु शनिवार सुचुकुचु यासे सम्पदा ल्यंकः म्वाकः तयगु च्वछाय् बहगु ज्या याडः दिल। खँचा पुखु सुधार समितिया ग्वासालय् जूगु उगु ज्या इवः नगर प्रमुख सुनिल प्रजापति जु नपां मेपुं जनप्रतिनिधिजुपुं नं भायो स्वयो दिल।

समितिया नायो भाजु पुण्यराम शिवहरी जुं २०७२ सालया तः भव्याचां लिपा ल्हवनय् कानय् याडः हः सेनिं छुँ तः तः जायो डातापोल्हँया किचा अपलं खानय् मदय धुंकगु खाँ काडः दिल।

सचिष्ठत हिङ्डागूगु ख्वप पौ. बःछि पौ(पाद्धिक)

ख्वप नगरपालिकाया प्रमुख प्रशासकीय अधिकृत विजय कुमार शर्मा मानव सभ्यताया विकास नपां नपां मूर्त व अमुर्त सम्पदाया विकास जूगु खाँ व्याकसे थजगु ज्या इवः न्ह्याकय् फःसा पर्यटकपुं अपलं द्वाहूँ वैगु खाँ काडः दिल।

सांस्कृतिक सम्पदा पदयात्रा उलेज्याया इलय ख्वप नगरपालिका वडा नं ९ या वडाध्यक्ष रबिन्द्र ज्याख्व व क्वचाय्केगु ज्या इवः सं ख्वप नगरपालिका वडा नं. ५ या वडाध्यक्ष योगेन्द्र मान बिजुक्छँ जुं ज्या इवः याय्मःगु छाय् अलय् थुकिया तातुना छु खः धायगु खाँ काडः दिल।

'ख्वपया पूखु सिइकेनु, सम्पदा ल्यंकः म्वाकः तयता हज्यायनु' धायगु नारा ज्वड वडा नं ९ लामगः पुखुलीं न्ह्याकगु सांस्कृतिक पदयात्रा नगांचा, ग्वंगः पुखु, क्वाठण्डौ पुखु, तिनाछैं-सलाँगणेशपुखु, वसिकुलां नाग पुखु, दुगुमला-भोलाछैं पुखु, अँचा पुखु, व्यासी पुखु, ख्यो पुखु (धावाहिटी पुखु), कालदह पुखु, तःपुखु, तःपुखु (सिद्धपुखु) जुयो न्हूँ पुखु (रानीपुखु) थ्यंकः क्वचायकगु खः।

सांस्कृतिक गतिविधि व स्थानीय उत्पादनता च्वजाय्केता थाय् थासय् सांस्कृतिक प्याखं, नसा ब्वज्या (स्टलनपां) नपांकीथाय् या थःगु हे उत्पादनत ब्वज्या नपां मियगु नं यागु जुल। उगुच्याली सं ख्वप नगरपालिकाया जनप्रतिनिधिपुं कर्मचारी, ब्वनय्कुथिया शिक्षकपुं ग्वाहालीमिपुं थी थी संघ संस्थाया प्रतिनिधिपुं कासा पुचःत बाजाखलः नपां नगरबासी तस्कं लयतायो ब्वति कायो दूगु खः।

लुमांक्य् बहगु खाँ उगु ज्या इवः याय्ता नगर प्रमुख सुनिल प्रजापतिया नायो सुई ख्वप नगरपालिकाय् मुकः सल्लाह व्याकगु खः।

ख्वप अस्पतालया सेवा



ख्वप नगरपालिकापाखं चाय्कः तःगु ख्वप अस्पतालं मचाबुइकेगु प्रस्तुति सेवा न्ह्याकगु नेला ल्याया म्हवचा इलय हे डयम्हा सिता प्रसुति सेवा बिय धुंकगु दः।

सचिव हिंडागृह ख्वप पौ. बःछि पौ(पाद्धिक)

साउन २० जाते

लिशा, सेकण्डरी स्कूलया २०७९ सं एसईई पास जूपू छवनानिपिन्ता लसहना ज्या इवः नपां बिदाइ ज्या इवः नगर प्रमुख सुनिल प्रजापतिया मू पाहैलय सिटिगाउँया हलय यासे प्रमुख प्रजापति जुं उलेज्या याडः दिसे छवनामिपुं थःथःगु लागाय् विशेषज्ञ जुयो वयता अपलं मेहनत यासे अनुशासित जुयो हज्याय् मः धायो दिल ।



थाकु मचःसः थःगु आजु पुवांक देया जनशक्ति जुयो हज्याडः वसा विकास जुइगु खाँ व्याकसे वयकलं स्थानीय संस्कृति, सम्पदा व न्हयलुवापुं म्हासिइकेता स्थानीय पाठ्यक्रम तयागु खाँ नपां भिंपुं सड्गत याडः सकले भिं जुइगु लाँपु ज्वडः हज्याय् मः धायोदिल ।

छवनामिपुं राजनीतिं तापाक्क च्वनय् मज्यूगु विचः प्वक्से प्रमुख प्रजापति जुं मभिंगु राजनीतिं समाजं दुःख सिइगुलि राजनीति सेवा याय्गु लाँपु खः धायो दिसे वयकलं विदेशय वांसा आनानं सयक भीगु देशय छ्यलय मः धायो दिसे गरिव पिनिगु व्यवस्था समाजवाद खः धायो दिल ।

निरीक्षण

साउन २१ जाते

ख्वप नगरपालिका वडा नं २ या नरमल्ला फल्चा लिपिड दानय्गु इवलय थाँ स्थानीय जनतां श्रमदान याडः प्वलहँ चियगु ज्या जुल । ख्वप नगरपालिकाया प्रमुख सुनिल प्रजापति आना भायो स्वयों दिल । २९ लाखया योजनातयो दाडः च्वंगु उगु फल्चाय् प्वलहँ चिय्ता ८० म्हा स्वयो अपलं स्थानीय मनूतय्सं जनश्रमदान



विशेषज्ञ जुयो वय मः

प्राध्यापक समाजया नायो भाजु सरोज राज गोसाई जुं छवनामिपुं दक्ष जुयो देश व जनताया सेवा याइपुं, तथ्यं सत्य मालिपं, भिंगु सड्गत नपां भिंस्हा मासं महान वैज्ञानिक दय्किगु वैज्ञानिक एडिसनया धापु नं लुमांकय मज्यू धायोदिल ।

अथेहे इसानया केन्द्रीय अध्यक्ष प्रेमजन थापा जुं छवनामिपिसं (सय्केगु) शिक्षा नपां व्यवहार नं सय्केमःगु, छवनामिपुं तःलासा अभिभावक शिक्षक व सामाजिक अगुवापुं नं लय्ताइगुलिंब्वनय्ता छैं या लकस बांलाकय मः धायो दिल ।

अथेहे वडाध्यक्ष रविन्द्र ज्याख्व(९) जुं लिच्चवः जक ब्वडागुया दापु मखु धायोदिसे भिंपुं न्हयलुवा पिन्के विचः कायो थःगु देया लागिं सेवा याय्गु देशभक्ति भावनां प्याकः खराब चरित्रया नेता व मन्त्री तय्सं भ्रष्टाचारय दुडः च्वंगुलिं देश व जनतां दुःख स्यूगु खाँ काडः दिल । अथेहे वडाध्यक्ष कृष्ण प्रसाद कोजुं (द) पुँजीवादी व्यवस्थाय गरिब जनतां च्वय थ्रंक ब्वनय् मफौलि ख्वप नगरपालिकां म्हवचा धेबां दांकः भिंक ब्वंक च्वंगु खाँ कुलदिल ।

लिशा इड्गलिश सेकेण्डरी स्कूलया प्रिन्सिपल लिशा प्रजापति जुं इच्छाशक्ति बल्लाक हज्याय्मः धायोदिलसा विद्यालय व्यवस्थापन समितिया नायो भाजु बलराम प्रजापति जुया नायोसुई च्वंगु उगु ज्या इवः सं सहायक प्र.अ. सुरेश रञ्जित, शिक्षिका नारायणी खोजु व एसईई पास जूम्हा छवनामि सोनम प्रजापति नं न्वचु तयो द्यूगु खः । शिक्षिका कृष्णश्वरी दुवालं ज्या इवः छाय् याय्माला धाय्गु खाँ काडः द्यूगु खः ।

यागु खः ।

अथेहे ख्वप नगरपालिकापाखं चाय्कः तःगु वडा नं १ भाजु पुख्या पश्चिमपाख्य च्वंगु शिशु स्याहार केन्द्र नगर प्रमुख सुनिल प्रजापति जु भायो स्वयो दिल । नपां प्रमुख प्रशासकीय अधिकृत विजय कुमार शर्मा नं भःगु खः । उगु केन्द्रे ४० म्हा मचात, नेम्हा शिक्षिका व नेम्हा आया दिदी पिसं ज्या साडः च्वंगु खः ।



सचिवत हिंडागृह ख्वप पौ. बःछि पौ(पाद्धिक)

सांस्कृतिक गुरुपुं मुकल

साउन २२ ज्ञते

ख्वप नगरपालिकाया ग्रसालय २०८० या गाईजात्रा (गुन्हिपुही, सापारु) बलय् क्यनिगु परम्परागत व आधुनिक सांस्कृतिक विधाया धिंधिंबल्लाता तयारी काथं मुकंगु सांस्कृतिक गुरुपुं नगरया दाफा भजन, सांस्कृतिक खलः, या प्रतिनिधिपित्ता ख्वप नगरपालिकाया प्रमुख सुनिल प्रजापति जुँ ख्वप देता म्वाडः च्वंगु ख्वप दे काथं ल्यंकः तय्ता ख्वपया मूर्त, अमूर्त सम्पदात कला व संस्कृति म्वाकः तय्गु सकलसिया कर्तव्य खः धायोदिल ।



वयकलं समाजय् ह्यूपा ह्यता सकलसिनं थः थः गु थासं कुतः याय् मःगु खाँ ब्याकसे हःन्य् वयो च्वंगु (गाईजात्रा) सापारुता सुरक्षित सभ्य व सुसंस्कृत काथं न्ह्याक्यता फुक्क हज्याडः ज्या सानय्मः धायो दिल ।

खुसी बः स्वःभाल

ख्वप नगरपालिकाया प्रमुख सुनिल प्रजापति जु तसिकं वः वयो तःब खुसी बः वयो खुसी बःलं स्यंकगु थाय् थासय् भायो स्वयोदिल । उगु इवलय् ख्वप नगरपालिका वडा नं १ घालाँ खुसी, वडा नं ३ या बाराही ताँ, वडा नं ४ या राममन्दिर व शान्ति निकेतन मा. वि., वडा नं ७ या खोँह (हनुमानघाट) व थुसाचा, भिसिंख्यलय् थीथी थासय् खुसी बः दुब्बाडः स्यंकथाय् स्वः भःगु खः ।

नेत्नु स्वन्हू तक मदिक्क व वयो च्वंगु नपां म्हेग बहनी निसें उताकं व वयो हनुमन्ते खुसी बः वगुलिं वाबुँ ब्वनय्कुथि, ब्यापारी भवन अस्पताल व सम्पदात नाखं बुरय् ज्गाँ खः ।

वयकलं ख्वपया सांस्कृतिक गुरुपुं सकलें विश्वविद्यालयया प्राध्यापकपुंति ग्यंपुं धायोदिसे मनुतय्ता शिक्षा व अनुभवं अपलं ज्ञान विडगु खाँ ब्याक दिल ।

ज्या इवः सं वडा नं ९ या वडाध्यक्ष रविन्द्र ज्याख्व जुं सापारुता प्रगतिशील काथं डाय्के बियगु ख्वप नगरपालिकाया तातुना खः धायो दिसे नगरया ब्वनय् कूथिं थी थी परम्परागत प्याखं व बाजात स्यडः हःगु खाँ काडः दिल सा मेम्हा वडा नं ७ या वडाध्यक्ष उकेश कवांजुं सांस्कृतिक प्याखंया धिंधिं बल्ला यासेलिं सभ्य व सुसंस्कृत समाज दय्केता ग्राहाली जुइगु नपां सांस्कृतिक गुरुपिनिगु व प्याखं म्वः तय्गु सीप म्वाकः तय्ता ई काथंया धिं धिं बल्ला याडः च्वंगु लसकुस याय् लाइकगु ज्या खः धायोदिल ।

आना भः पुं सांस्कृतिक गुरु पिसं ताडः वानय्तांगु परम्परागत प्याखंत ल्यंकः तय्ता कुतः यायमःगु, ई काथं सिरपाया धेबा ताडः यंकय् मःगु, सापारुबलय् सिद्धिमदय्क वैगु पहःत पानय् मःगु सापारु बलय् ल्य ज्या याई थाय् जक मखु फुक्क चाहिलिगु लाँपुइ चादांकः क्यनय्मःगु, ख्वप दे या कला संस्कृति, प्याखंत बाजागाजाया अध्ययनया लागिं अनुसन्धान केन्द्र दय्केमःगु, हःनय् लायঁ सिद्धि बः बांक बाजा मथाक्य् मःगु, आधुनिक व परम्परागत पाख्यया पिब्बया व गाईँचाम्ये मुडः पिथानय् मःगु खाँत सुभाव ब्यूगु खः ।

उगु ज्या इवः सं ख्वप नगरपालिकाया प्रमुख प्रशासकीय अधिकृत विजय कुमार शर्मा सुभाय देशायो द्यूगु खः ।



समाजय् हयपा हयता शिक्षा मदयक मगा

साउन १९ गते मा.वि. विज्ञान शिक्षक पिनिगु छन्हया कार्यशाला गोष्ठी खप नगरपालिकाया प्रमुख सुनिल प्रजापति जुं उलेज्या याडः दिल । गोष्ठी सं प्रमुख प्रजापति जुं शिक्षण पेशा जागिर जक मखुसें न्हुँगु पुस्ताता देश व समाजया लागिं सेवा याइपु जनशक्ति ब्वंलाकय् गु थाय् जुय मः धायो दिसे विज्ञान व गणितया प्रयोगशाला दय्केगु नगरपालिकाया तातुना दःगु खाँ व्याकसे विज्ञान विषय या शिक्षण प्रयोग बिना उलि धिसिमलाइगु नपां संसारय् बिनास व बिकास विज्ञान हे याडः च्वंगु खाँ कुल दिसे विज्ञान दे व समाज हछ्याइगु काथं ब्वंकय् मः धायो दिल ।



अः विज्ञानया प्रगतिया धिंधिंबल्ला चीन व अमेरिकाया दथवी जुयोच्वंगु खाँ कुलदिसे अनुसन्धानय् अमेरिकां दाच्छिया ६२ खर्व डलर खर्च याइगु खःसा चीनं ४ खर्ब याड च्वंगु दः गनाकि नेपालं ४१ करोड तका जक बजेट छखय् लिइकगु दः । वनं पू वांकः ज्या याय् मफः ।

अनुसन्धानं आविष्कार याई गुकीं दे हज्याई धायोदिसे हलिमयया तःतः हांपु वैज्ञानिकत नं न्हपा भीपुं ब्वनामि पुथें हे जुगुलिं भीपुं ब्वनामि पिन्ता उत्साहित याय् फःसा छुं नं छुं गथे प्रगति मजुई धायो दिसे वयकलं इमान्दार जुयो ज्या मसांगुलिं भीथाय् या कृषि अनुसन्धान केन्द्र नार्क ता नरक मधाइगु जुई धायो दिसे न्हुँपुं व पुलांपुं शिक्षकपुं छथाय् सं च्वडः तालिम कायो बिचः कालबिल याडः बांलाइगु विश्वास प्वकः दिल ।

अथेहे प्रमुख प्रशासकीय अधिकृत विजय कुमार शर्मा जुं थः नं १७ दा आखः ब्वंकान्ति तिनि निजामितिखय् व्यागु खाँ व्याकसे पाठ्यपुस्तक नपां पाठ्यक्रमत नं ब्वनय् मःगु नपां मचातय् ता ख्याडः मखुसें न्ह्यसः न्यनय् फैगु काथं याय् पु दय्के फःसा बांलाइगु धायो दिल ।

विद्यालय अनुगमन व प्राविधिक सहयोग समितिया कजि नपां वडा नं ५ या वडाध्यक्ष योगेन्द्र मान बिजुक्छुं जुं लसकुस याडः दिसे समस्या थुइक ब्वंकय् फःसा बांलाइगु खाँ व्याकः दिल ।

नगर शिक्षा शाखा प्रमुख कृष्ण प्रसाद कर्माचार्य गोष्ठी

याय् मःगु खाँ नपां नगर शिक्षां याडः च्वंगु ज्या कुल दिल । नगर दुनयया ५० म्हा विज्ञान शिक्षकत दुतिंगु गोष्ठी सं वरिष्ठ विज्ञान शिक्षक राजेन्द्र बहादुर काय्याल जुं सहज कर्ता जुयो ११ ग् पाठ्य इकाइ ११ ग् पुचलय् ब्वथयो छलफल यागु खः ।

अथेहे खप नगरपालिकाया नगर शिक्षा शाखाया रवसालय पूर्व प्रा.वि. शिक्षकपिनिगु छन्हया तालिम या उलेज्या साउन २२ गते खप नगरपालिकाया उपप्रमुख रजनी जोशी जुं याडः दिसे शैक्षिक जग ब्लाकय् थापुतालिम व्यागु खाँ व्याकसे शिक्षाखय् यागु लगानीया लिच्चवः मथां मवइगु जूसां समाजय् हयपा हयता शिक्षां धात्येगु रवाहाली याइगु खाँ काडः दिल ।

दे हछ्याय् ता भीसं यक्व ज्या याय् बाकी दःनि धायोदिसे वयकलं पूर्व प्रा. वि या शिक्षिकापुं मचातय् मां सरहयाय् पुं खः धायोदिल । उकीं बाल मनोविज्ञान थुइकः ब्वंकय् गु, न्हयलुवापिसं याडः वांगु ज्या याता हनाबना याडः न्हुँगु पुस्ता हज्याडः, ज्या याय् ता घ्वासा बियो दिल ।

ज्या इवः सं विद्यालय अनुगमन व प्राविधिक सहयोग समितिया दुजः ज्ञानसागर प्रजापति जुं शिक्षक पेशा धेबाया मखू इज्जतया पेशा खः उकीं थाकु मचः से थःगु पेशाखय् हज्याय् ता घ्वासा बियो दिल ।

वागीश्वरी कलेजया प्राचार्य धन कुमार श्रेष्ठ तालिम रवाहाली याइगु खाँ काडः दिलासा नगर शिक्षा शाखा प्रमुख कृष्णप्रसाद कर्माचार्य शैक्षिक लागा च्वजाय् केता बियो च्वंगु तालिम कायो कक्षाकोथाय नं छ्यलय् ता आग्रह याडः दिल ।

क्वचाचाय् केगु ज्या इवः सं दुतिपुं पाखं बिष्णुमाया लामां खप नगरपलिकाता सुभाय देछासे सामुदायिक व संस्थागत ब्वनय् कुथिता नपां नपां यंकय् तांगु कुतः बांला धायो दिसे ई मचः गु नपां मेगु तालिम नं न्ह्याकिगु आशा तयो दिल ।



तालिमय् ब्वतिकःपुं द२ म्हा पूर्व प्रा.वि. शिक्षकपिन्ता स्वंगु पुचलय् ब्वथयो- व्यावहारिक तालिम नं व्युगु खः । ब्वनामिपुं मध्ये देवना जोशी ब्वतिकःपिन्ता थमनं सय्कागु सीप ब्वनय् कुथिया मेपुं सहकर्मी पासा पिन्ता स्यनय् ता आग्रह याडः दिसे: छ्यः मध्यः स्वयता ब्वनय् कुथित नं स्वः व्यगु खाँ व्याकः दिल ।

सचिव हिंडागृह ख्वप पौ. बःछि पौ(पाद्धिक)

डातापोल्हे कर्नर टीमया पलिस्था दिं

ख्वप नगरपालिकाया प्रमुख सुनिल प्रजापतिया मू. पाहाँल्य् डातापोल्हे कर्नर टीमया ४० दाया पलिस्थादिवसया लसताय हिदान व ख्यें बलचाया धिधिंबल्ला कासा कवचाय्क सिरपा लःल्हाय् ज्या इवः जुल । ज्या इवः सं मू. पाहाँ प्रजापति जुं ख्वप नगरपालिकां कासामिपिनिगु मन च्वजाय्कः थी थी कासाया धिं धिं बल्ला याडः वयो च्वंगु ख्वप नगरपालिका बेखाल १० या टेबुल टेनिस कभर्डहल कवचाइथे च्वंगु खाँ ब्याकसे कासाया लिधंसाय् ख्वप देता म्हासिइका पिब्बयकेगु तातुडः पूर्वाधारत दयकः वयो च्वंगु नपां देशं दुनय व देशं पिनय्या पर्यटकपिन्ता ख्वपय साल्यता नगरपालिकां पर्यटन विकासय् नं बः बियो वयो च्वंगु खाँ काडः दिल ।

वयकलं ख्वपया पुखुता चाहिलय मन्दैगु काथंया ज्यात न्ह्याकः मू. लायँ थी थी सिमाचा, स्वंमा नपांया गमलात तय् गु ज्या याडः पर्यटकपुं अपलं वसेलिं थानाया आर्थिक ज्या इवः नं बालाड वानिगु विश्वास एवंकः दिल ।

डातापोल्हे कर्नर टीमया नायो शिव सुन्दर गोठें थुगु टीम सामाजिक सेवा व कासाता च्वजायकेगु तातुडः पलिस्था यागु खाँ काडः दिलसा टीमया संस्थापक (निस्वानामि) नायो शिवनारायण गोठें त्वः विकासया थां काथं थुगु टीमं थी थी ज्या इवः त याडः वयों

लिटिल वर्ल्ड्या ब्वनामिपुं रव्वप नगरपालिकाय्

साउन २३ गते

लिटिल वर्ल्ड इड्गलिश स्कूलया ब्वनामिपुं थौं ख्वप नगरपालिकाय् अध्ययन भ्रमणय् वयो ख्वप नगरपालिका प्रमुख सुनिल प्रजापति नपाँ नपालाड ख्वप नगरपालिकाया ज्या, कर्तव्य व अधिकार नगरसभा व कार्यपालिका गठन याइगु ज्या इवः, नगरपालिकां शिक्षा, स्वास्थ्य पर्यटन, प्रवर्द्धन, सुचकुचु थजगु थी थी ज्या इवः तः सिइकल ।



च्वंगु खाँ काडः दिल ।

उगु ज्या इवः सं सल्लाहकारपु नेम्हा श्याम सुन्दर धौभडेल व राजा राम चवाल, न्वकु मुक्ति सुन्दर जधारी व छ्याङ्जे रोशन धौभडेल नं न्वचु तयो द्यूगु खः ।

डातापोल्हे कर्नर टीमया ग्वसालय ज्गु ख्यें बल कासाख्य् तःलापु कासामिपिन्ता नगरप्रमुख प्रजापतिजुं मेडल, दिसिपौ व सिरपा लःल्हाडः द्यूगु खः ।

विकास कोष लः ल्हात

साउन २५ गते



ख्वप नगरपालिका बडा नं ३ वासिक त्वालय्या समझदारी बचतं सामुदायिक विकास कोषय मुडः तःगु बच्छी धेबा १५४७५ तका दाँ ख्वप नगरपालिकाया प्रमुख सुनिल प्रजापति जु याता लः ल्हाडः बिल ।

सचिव हिंडागृह खप पौ. बःछि पौ(पाक्षिक)

छात्रवृति लः ल्हात

साउन २७ ज्येष्ठे

खप नगरपालिकामा ११ वर्षु व हिन्द्यामा तिर्थी बदले: च्वापुं ब्वनामिपिन्ता छात्रवृति छनोट समितिया परीक्षा पास यापुं ब्वनामिपिन्ता शनिबार छागृह ज्याइः याडु छात्रवृति सिफारिस पौलः ल्हाडु बिल। उगु पौ खप नगरपालिकाया प्रमुख सुनिल प्रजापति जुँ १२७ म्हा सिता ७० लाख तका क्वतिया छात्रवृति ब्यूगु खः। वयकलं ब्वनामिपिसं थःगु योग्यता व क्षमतां धः थें थः योगु विषय ल्ययो च्वय् थ्यकः या शिक्षा कायो देश व जनताया सेवायायता लाँपु क्यडुः दिसे नगरपालिकामा छात्रवृति ब्यूगुया अर्थ असिगु शैक्षिक विकास् लायः छ्यःगु खः धायोदिसे खपपथ् हे बालागु कलेज चाय्कः बालाम्हा मनु जुयगु मौका ब्यू ब्यू वयो च्वंगु, शिक्षाता व्यापार मयासें मेडिकलया लागा माफियाया लाहातं फ्यनय् फ्यक्के मः धायोदिल।

खप नगरपालिकामा छात्रवृति नपां नपां शैक्षिक ऋण तं व्यवस्था याडुः च्वयया शिक्षा काय्ता रवाहाली याडुः वयो च्वंगु खाँ व्याकसे प्रमुख प्रजापति जुँ छात्रवृतिखय् ब्वापुं ब्वनामिपिसं अनुशासित व इमानदार जुयो बदले: समाजया उत्तरदायी ज्याया याय् मः धायो दिल।

अथेहे छात्रवृति वितरण समितिया दुजः नपां खप नगरपालिकाया बदला नं ९ या बडाध्यक्ष रबिन्द्र ज्याहाव जुँ शिक्षा लागाय् नं थी थी मभिंगु ज्यात द्वाहँवयो च्वंगुलि सचेत यासे न्हूँगु पुस्ताया ब्वनामिपुं सभ्य व सुसंस्कृत जुयो देश व समाजया भिं



ज्याखय् जुयमः धायोदिल।

अथेहे खप नगरपालिका बदला नं ७ या बडाध्यक्ष उकेश कवां जुँ ब्वनामिपिन्ता छात्रवृतिया तहांगु महत्व दैगु खाँ व्याकसे ब्वनामिपिसं देशया सेवा याय्गु च्वजःगु शिक्षा काय्मः धायो दिल।

उगु ज्या इवः सं खप मा.वि. या प्राचार्य लक्ष्मी प्रसाद द कर्माचार्य व नगर शिक्षा शाखाया भक्तपुरया प्रमुख कृष्ण प्रसाद द कर्माचार्य तं मार्ग निर्देश याडुः दिल।

खप नगरपालिकामा शैक्षिक वर्ष २०८०/८१ या लागि व्यवस्थापन संकाय पाखय् ६७ म्हा, विज्ञान संकाय खय् ३८ म्हा, मानविकी खय् १० म्हा, शिक्षाखय् ६ म्हा कानुनय् ६ म्हा याडुः १२७ म्हा ब्वनामिपिन्ता छात्रवृति सिफारिस पौलः ल्हाडुः ब्यूगु खः।

खप इन्जिनियरिङ् कलेजय् शैक्षिक प्रदर्शन

साउन २८ ज्येष्ठे

खप नगरपालिकापाखं चाय्क तःगु खप इन्जिनियरिङ्



कलेज व खप कलेज अफ इन्जिनियरिङ् या मंकः कुतलय National architectural Exhibition Final year Project Exhibition (Computer, Electrical and Electronics and communication Engineering) नेह्न्या शैक्षिक ब्वज्या थौं निसें न्ह्यात। उगु ब्वज्याया उलेज्या याडुः दिसे खप नगरपालिकाया प्रमुख सुनिल प्रजापति जुँ शैक्षिक ब्वज्यां ब्वनामिपिन्ता इन्जिनियरिङ् थी थी विधाया ज्ञान दैगु खाँ व्याकसे थुकीं दक्षता नं याइगुलि थजगु ब्वज्या कलेज इलय ब्यलय याडुः तुँ च्वनयमःगु गुकिं ब्वनामिपिन्गु मन हवइगु, अलय ब्वनामि पिन्गु मेहेनत न अप्वयो बालाडुः वानिगु विश्वास प्लकः दिल।

सरकार अःहःगु शिक्षा विधेयक्य् हिन्यामा तिर्थी तकया फुक्क अधिकार पालिकाता ब्यूगु न खारेजयाडु जिल्ला शिक्षा

सचिवत हिंडागृह ख्वप पौ. बःछि पौ(पाद्धिक)



कार्यालय हकनं म्वाकः हयतांगु संविधान व संघीयताया अखः खः वयकलं धायोदिल ।

स्थानीय तहता अधिकार जाय्कः बल्लाक यंकसा जक जनतां प्रजातन्त्र वगु मति तैगु खाँ ब्याकसे वयकलं शिक्षा विधेयकं स्थानीय तहता ब्वनयकुथिया प्र.अ., नियुक्तिख्य नपां अधिकार मवियगु स्वगु मिलय मजगु खाँ खः वयकलं धायोदिल ।

सरकारं भ्य टावर दय्कः करोडाँया बजेट ख्ये मछैगु लागाय् लाय छ्यलः दे कतया भरय म्वाय माय्क च्वंगु खाँ कुल दिसे वयकलं अःपुगु काथं ज्या जक व्यनय्थै याइगु ब्वसामारी सुयायगु भिं मजुइगु खाँ ब्याकसे वयकलं जनताया भिं ज्याख्य् हज्याय् मः धायोदिल ।

ख्वप इञ्जनियरिङ्गया प्राचार्य सुजन माकं ख्वप नगरपालिकां चाय्कः तःगु कलेजं ई काथंया ज्या इवः न्हयाकः वयो च्वंगु खाँ कुल दिसे नेन्हया शैक्षिक ब्वज्या त्रिभुवन विश्वविद्यालयया सम्बन्धन कायो तःगु मेमेगु कलेज नं दुतिंगु खाँ काडः दिल ।

अथेह ख्वप कलेज अफ इञ्जनियारिङ्गया प्राचार्य सुनिल दुवालं सकलसिया मेहनतं शैक्षिक ब्वज्या तःलाइगु नपां अनुसन्धानया ब्वनामिपिन्ता ग्वाहाली जुइ धायो दिल । अथेहे आ.अर्चना बाडे श्रेष्ठ व रविना शिल्पकारं नं न्वचु तयो द्यूगु खः ।

ज्या इवः लिपा नगर प्रमुख प्रजापति जुं कम्प्यूटर, इलेक्ट्रिकल व इलेक्ट्रोनिक्स एण्ड कम्प्यूनिकेशन इञ्जनियरिङ्ग विषयसं ब्ययो तःगु शैक्षिक ब्वज्या स्वयो दिल ।

अंगदान व अंगप्रत्यारोपणया अन्तरक्रिया

साउन २८ ज्ञते

विश्व अंगदान दिवसया लसताय् अंगदान व अंगप्रत्यारोपणया अपलं जनचेतना ग्वाकय्गु तातुडः सहिद धर्मभक्त राष्ट्रिय प्रत्यारोपण केन्द्र ख्वपया ग्वसालय् अन्तरक्रिया ज्या इवः जुल ।

ज्या इवः सं ख्वप नगरपालिकाया प्रमुख सुनिल प्रजापति जुं अड्गा दान जीवन दान खः धायोदिसे थजगु खाँ जनस्तरय् यंकः सीयधुंक अंग दान याय्गु विषय फुक्कसिता ग्वाकय् मः धायोदिल ।

सहिद धर्मभक्त राष्ट्रिय प्रत्यारोपण केन्द्र पलिस्था यागु हिंस्वदा क्यंगु इलय है थुगु, केन्द्रं अपलं मूपुलः वय धुंकगु खाँ ब्याकसे वयकलं ख्वप देता शैक्षिक हवकाथं हज्याक्यता थाना अस्पतालत सुविधां जःगु व जनशक्ति जाय्केता विशेष विचः याय्मः धायोदिल ।

ख्वप नगरपालिकापाखं चाय्कः तःगु ख्वप अस्पतालं हिं च्याम्हा बिरामीपिन्ता सेवा बियो वयो च्वंगु खाँ कुल दिसे वयकलं सरकारी अस्पतालत बालासा गरिब जनताया सेवा जुइगु खाँ काडः दिल । सरकारी अस्पतालय् समस्या वलकिं निजी अस्पतालय् ख्यय वगु थं ताय्किगुलिं सरकारं थःगु मातहतया फुक्क अस्पतालता भिंकः बालाकः हछ्याय् मः धायोदिल ।

केन्द्र्या कार्यकारी निर्देशक डा. पुकार चन्द्र श्रेष्ठं नेपालय्हे सेलाँ नं तकय्गु (प्रत्यारोपण) ज्या न्हयाकसेलि बिरामीपुं विदेशय्



वानय् म्वःगु, सहिद धर्मभक्त अड्गा प्रत्यारोपण केन्द्र नेपालय दकलय् न्हपां सेला नं छुकगु खः धायोदिल । केन्द्र्या सेवा सुविधा च्वजाय्केता स्थानीय तहं नं मःकाथंया ग्वाहाली याइगु आशा यासे वयकलं अड्गदान याक्यता जन चेतना थानय् ता केन्द्रं ज्या साडः च्वंगु खाँ नं काडः दिल ।

केन्द्र्या प्रमुख डा कल्पना श्रेष्ठं अड्गा दानयाय् खाँ जनतात समुदाय खय वाडः, हे याय मःगु खाँ काडः दिसे थजगु ज्या पूण्यया ज्या खः धायोदिल । ज्या इवः सं अड्गा दानया वृत चित्र नं क्यंगु खः ।

सचिव हिंडागृगु ख्वप पौ. बःछि पौ(पाक्षिक)

गुन्हीपुन्ही भदौ १३ गते व सापारु १४ गते डाय्केगु

साउन २२ गते

थुगुसी गुन्ही पुन्ही व सापारु छन्हुं तु लागुलिं जनमानसता अलमल मजुइकः ख्वप नगरपालिका व स्वापु दः पुं तलेजुया मूल पुजारी (राजोपाध्याय), पुजारीपुं (कर्माचार्य व जोशीपुं) च्वडः भाद्र १३ गते गुन्ही पुन्ही व १४ गते सापारु डाय्केगु खाँ व्वः छ्यूगु खः ।

ख्वप नगरपालिकाया प्रमुख सुनिल प्रजापतिया नायो सुई च्वंगु स्वापु दः पुं नपांया बैठक ज्योतिषशस्त्रकाथं भाद्र १३ गते बुद्धबार चतुर्दशी (१४) घ.प. ११.२८ प्रात, घ.मि. १०.१७ प्रात व वनंलिपा भदौ १४ गते छन्हुं तु विहिवार पुन्ही (१५) घ.प. १५.१८ प्रात, घ.मि. ७.४९ प्रात ७.४९ मिनेट लिपा परेवा (प्रतिपदा) जुइगु, सापारु सुह जुइगु ई जूगुलिं भदौ १३ गते सुथाय्सिया १०:१७ ता इलय् निसें पुन्ही सुह जुई भदौ १४ गते सुथाय् ७:४९ ता इलय् तक दैगु अलय् सापारु जुइगुलिं भाद्र १३ गते गुन्हिपुन्ही व भदौ १४ गते सापारु डाय्केगु खाँ व्वः छित ।

बैठकसं शिक्षा, सस्कृति व स्वास्थ्य समितिया दुजः पुं उप



प्रमुख रजनी जोशी, बडाध्यक्ष योगेन्द्र मान बिजुक्छँ, का.पा. या द्वः: कृष्ण प्यारी भूजु, प्रमुख प्रशासकीय अधिकृत विजय कुमार शर्मा व तलेजुया पुजारी पुं प्रजेश राज राजोपाध्याय, नरेन्द्र प्रसाद जोशी, महेन्द्र कर्माचार्य, पदमलोचन कर्माचार्य, सिद्धिवीर कर्माचार्य व केदार प्रसाद जोशी पुं नं भःगु खः ।

नेह्या शैक्षिक ब्वज्या क्वचाय्केगु ज्या इवः

साउन २२ गते

ख्वप नगरपालिका पाखं चाय्कः तःगु ख्वप इञ्जनियरिडु कलेज व ख्वप कलेज अफ इञ्जनियरिड्या मंकः रवसालय श्रावण २८ गते निसें न्ह्याकागु National architectural exhibition –Final year project exhibition, computer, Electricalans Electronic and communication engineering ‘आरोहण’ शैक्षिक ब्वज्या क्वचाय्केगु ज्या इवः सं ख्वप नगरलिकाया उप प्रमुख रजनी जोशीं उगु ज्याइवः तः लाक क्वचाय्कागुलिं सुभाय् देछायो दिसे अःलिपा नं राष्ट्रिय अन्तर्राष्ट्रिय ब्वज्या यायां यंकय् मःगु नपां आर्किटेक्ट, इलेक्ट्रिकल, इलेक्ट्रोनिक्स व कम्यूनिकेशन इञ्जनियरिडु नं दे हछ्यायता मःगु ख्यानं अजपुं ब्वनामिपिन्ता ज्या बिय मफःगुलिं कुख प्वंकः दिल ।

वयकलं सचिदा लिपाया ख्वप दे या लिधांसाय् शिक्षा, स्वास्थ्य सम्पदाया लागाय् ज्या साडः वयागु नपां ख्वप उ.मा.वि. पलिस्थायागु नीडादा क्यंगु, ख्वप देता ज्ञान विज्ञानया केन्द्र दय्केगु, श्रमता माया याइपु नागरिक ब्वलांकेगु मतिं नगरपालिकां इतिहास, भूगोल, राजनीतिशास्त्र दर्शनशास्त्र नेपालभाषा थजागु थी थी विषयलय् स्नातकोत्तर व विद्यावारिधि याइपिन्ता छात्रवृति वियो

ब्वज्या क्वचाल

च्वडागु, थः न्हपा ख्वप इञ्जनियरिडु कलेजया उप-प्राचार्य जुया बलय्या खाँ कुल दिसे दे व जनताया सेवा नपां सम्पदा ल्हवनय् कानय्ता मौका ब्यूगु खाँ कुल दिल ।

उगु ज्या इवः सं ख्वप नगरपालिकाया प्रमुख प्रशासकीय अधिकृत विजय कुमार शर्मा समाजता बुद्धिजीवीकरण याय्गुमति ज्या साडः च्वंपुं ख्वप इञ्जनियरिड्या ब्वनामिपिन्ता च्व छायो दिल ।

ख्वप इञ्जनियरिडु कलेजया प्राचार्य सुजन माकं उगु प्रदर्शनी सं अपलं ब्वनामिपिन्ता बांलागु लिच्चवः लागु थ्वनं लिपा तहांक अन्तर्राष्ट्रिय प्रदर्शनी याय्ता बः वगु खाँ ब्याकलसा ख्वप कलेज अफ इञ्जनियरिड्या प्राचार्य सुनिल दुवालं उगु ब्वज्या सं ब्वनामिपिसं बांलाक ज्या सांगु नपां थमनं सयकागु ज्या व्यवहारय् नं छ्यलय्मः धायो दिल ।

उप प्राचार्यपुं रविन्द्र फोंजुं व ई. रत्नशोभा प्रजापति, शिक्षक ई. योगेश बज्ञाचार्य व ब्वनामि प्रकाश केसी पिसं ग्वाहाली यापुं सकलसिता सुभाय दे छःगु खः सा शैक्षिक ब्वज्या खय् ब्वति कःपिन्ता मतिनाया चिं व दिसिपौ लः ल्हागु खः सा आकिटेक्ट रविना शिल्पकार नं न्वचु तयो दयूगु खः ।

ख्वप इंजिनियारिङ्य नेहूया शैक्षिक बज्या उलेज्या

(२०८० साउन २८ गते)



गुन्छीपुन्छी व सापारु पर्व डाय्केण्ट बैठक

(२०८० साउन २९ गते)



पुखु म्हासिइके सम्पदा ल्यंकः म्वाकः तय पद्यात्रा क्वचाल

(२०८० साउन २० गते)



ख्वप नगरपालिकाया 'पुखु म्हासिइके सम्पदा ल्यंकः म्वाकः तय' धायेणु

नारा ज्वडः यागु पद यात्राया उलेज्या

(२०८० साउन २० गते)

